



ANG

**Bayan**

Pahayagan ng Partido Komunista ng Pilipinas  
Pinapatnubayan ng Marxismo-Leninismo-Maoismo

Edisyong Hiligaynon  
Espesyal nga Isyu  
Disyembre 26, 2005  
[www.philippinerevolution.org](http://www.philippinerevolution.org)

# Padayon nga pasingkion ang mga taktikal nga opensiba sa bilog nga pungsod kag labing pabaskugon ang tanan nga mga rebolusyonaryong pwersa

**Komite Sentral**

**Partido Komunista sang Pilipinas**

**L**ubos nga malipayon nga ginasaug naton ang ika-37 anibersaryo sang liwat nga pagtukod sang Partido Komunista sang Pilipinas (PKP) sa teori-tikal nga ubay sang Marxismo-Leninismo-Maoismo.


Dayawon naton ang mga kada-lag-an sang Partido sa pag-pamuno sa paghimakas sang pumuluyong Pilipino para sa pungsodnon nga kahilwayan kag demokrasya batuk sa imperyalis-mong US kag mga lokal nga

mapanghimulos nga sahi sang daku nga kumprador kag agalon nga mayduta.

Tamyawon naton ang tanan naton nga mga kadre kag katapu, mga Pulang kumander kag hangaway sang Bag-ong Hangaway sang Banwa (BHB), mga aktibista sa nagkalain-lain nga mga organisasyon, tanan nga alyadong pwersa sa National Democratic Front of the Philippines (NDFP), tanan nga katapuan sang mga organo sang gahum pangpulitika kag ang malapad nga masa sang pumuluyo sa pagpursiger kag pag-angkon sang mga dalagku nga kadalag-an sa subong nga bag-ong demokratikong rebolusyon batuk sa dumuluong nga monopolyong kapitalista, lokal nga pyudalismo kag burukrata kapitalismo.

Hatagan naton sang pinakamataas nga pag-saludo ang aton mga rebolusyonaryong martir kag pasidunggan naton sila sa matutom nila nga pag-alagad sa banwa, mataas nga diwa sang pagsakripisyo kag tanan nga amot nila sa pagpasulong sang rebolusyo-naryong paghimakas. Nagaserbi sila nga inspirasyon sa pag-agum naton sang dugang nga dalagku nga kadalag-an. Padayunon naton ang pagpasinki sang taktikal nga opensiba sa bilog nga pungsod kag labi pa nga pabakuron ang tanan nga rebolusyonaryong pwersa.

Malawigan ang epekto sang Ikaduha nga Dunganon nga Kahublagan Panadlong sa pagpabas-kog sang Partido. Gintadlong naton ang mga rebi-syunista, empirista kag dogmatiko nga suhetibis-tang kasaypanan sa ideolohiya, ang "Wala" kag Tuo





## **Ang mayorya sang mga pungsod, nga nakasalig sa pag-eksport sang hilaw nga materyales, naputos sa depisito kag lumos sa utang, ang pina- kanahalitan sang pangkali- butanon nga sistemang kapitalista**

nga oportunistang kasaypanan sa pulitika kag ang mga kasaypanan sang burukratismo kag ultra-demokrasya sa organisasyon. Maligon nga gintib-ong ang pang-ideolohiyang linya sang Marxismo-Leninismo-Maoismo. Nagsulong kita santu sa pangkabilugang linya sang demokratikong rebolusyon sang pumuluyo paagi sa malawigan nga inaway banwa. Ginpalig-on

naton ang aton paghakos sa prinsipyo sang demokratikong sentralismo kag ginsunod ini sa pagtukod sang organisasyon sang Partido.

Yara kita sa kahimtangan nga hingalitan ang krisis sang kalibutanon nga sistemang kapitalista kag ang lokal nga nagaharing sistema kag pamunuan ang pumuluyong Pilipino sa paghimakas para sa pungsodnon nga kahilwayan kag demokrasya batuk sa imperyalismong US kag mga lokal nga mapanghimulos nga sahi sang dalagku nga kumprador kag agalon nga mayduta. Yara kita sa tunga subong sang nagadaku nga kahublagang masa para sa pukanon ang rehimeng Arroyo nga suportado sang US. Ang ligal nga demokratikong kahublagang masa nagasulong. Amo man, ang rebolusyonaryo nga armadong paghimakas, nga amo ang pangunahong porma sang paghimakas para sa pagpuhan mismo sang nagaharing sistema.

Tuman nga ginguba sang krisis

sang sobrang produksyon sa pangkalibutanon sistemang kapitalista ang mga pwersa sang produksyon sa mga imperyalistang pungsod kag labi gid sa mga atrasadong pungsod. Ginatulod sini ang mga imperyalistang estado nga labi nga magpamuyong, mapiguson kag agresibo. Sa sini, ang pumuluyo sang kalibutan ginaduso kag nahangkat nga magtindog kag magbatu.

Labi nga nagdalum kag naggrave ang krisis sang nagaharing sistema nga malakolonyal kag malapyudal gani labi nga nangin bayolente ang mga kontradiksyon sa tunga sang mga reaksyunaryo. Indi makahari sa daan nga paagi ang mga reaksyunaryo sa atubang sang pagpamahug nga maggamit sang armadong pwersa lunsay ang yara sa poder kag ang wala. Ginapasangki sang malapad nga masa sang pumuluyo kag mga rebolusyonaryong pwersa ang tanan nga porma sang paghimakas para sa mga basehang reporma kag rebolusyonaryong pagbag-o.

## **Wala-tupong nga paglala sang pangkalibutanon nga sistemang kapitalista**

**P**adayon nga nagalala ang pangkalibutanon nga sistemang kapitalista. Nagapabilin nagapundo ang ekonomya sang US kag iban pa nga industriyalisado nga kapitalistang pungsod. Wala pa makabangon ang mga ini halin sa pagluya sang ekonomya umpisa 2000. Sakapanaog lang ang tantos sang pagdaku sang mga ini, kon kis-a may pagtimbuok bunga sang mga rason sa guwa sang sustenidong pagtaas sang lebel sang produksyong industriyal. Ang mayorya sang mga pungsod, nga nakasalig sa pag-eksport sang hilaw nga materyales, naputos sa depisito kag lumos sa utang, ang pinakanahalitan sang

pangkalibutanon nga sistemang kapitalista. Ang mga pungsod sa Southeast Asia wala pa makabangon halin sa krisis pang-ekonomya kag pinansya 1997 nga dala sang pagbaha sang semi-manupaktura sang produktong re-eksport kag sang pribadong konstruksyon.

Tres bilyones ukon katunga sang katawhan ang nagakabuhi sa US\$2 kada adlaw. Ang daku nga mayorya sang pumuluyo sang kalibutan nagakabuhi sa miserableng kaimulon, sa pihak nga pwede dulaon ang kalibutanon nga kaimulon gamit ang nagaluntad nga teknolohiya kag bisan uno porsyento gid lang sang *gross domestic pro-*

*duct*. Ugaling sa idalum sang pangkalibutan nga kapitalistang sistema, kinahanglan sang monopolyong burgesya kuripunon ang ila superganansya halin sa ano man nga lebel sang produksyon kag sirkulasyon sang mga produkto pati na sa manipulasyon sang kapital pangpinansya. Gani, ang utang sa luwas sang mga atrasadong pungsod padayon nga lampuwas sa US\$3 trilyones.

Dapat tani ginapasanyog sang mas mataas nga teknolohiya ang sosyal nga kinaiya sang produksyon. Ugaling labi nga nagatalum ang pribado nga kinaiya sang pangankon sa bunga sang pagtrabaho

sa idalum sang neoliberal nga polisiya sang imperyalismo. Sa idalum sang polisiya nga ini, ginalaragway nga “hilway nga pagnegosyo” kag “hilway nga merkado” ang monopolyong kapitalismo kag nagaani sang superganansya kag nagatipon sang kapital ang mga monopolyong kapitalista paagi sa hayag nga paggamit sang estado agud idul-ong sa ila sang mga resorsa nga produktibo kag pangpinansya kag mga kontrata pang-estado kag agud panubon ang mga kita kag mga sosyal nga benepisyo sang proletaryado kag masang anakbalhas.

Sa sini, hut-ong-hut-ong nga nagalala ang krisis sang sobrang produksyon. Nagatinambak ang indi mabaligya nga produkto sa nagakupos ang balaligyaan bunga sang pagnubo sa ikasarang magbalkal sang masang anakbalhas. Umpisa katapusan nga bahin sang dekada 1970, mayorya sang mga pungsod nga nagasalig sa pag-eksport sang hilaw nga materyales naigo sang permanente nga krisis sang pangkalibutanon nga sobrang produksyon sa agrikultura kag hilaw nga mga mineral. Ang sobrang produksyon agrikultural sa mga industriyalisadong pungsod kapitalista indi lang sa pagkitid sang pangkalibutanon nga balaligyaan sang mga produktong agrikultural para sa mga atrasadong pungsod,

kundi pati sa tinambak sa mga lokal nga merkado nga nagawasak sa ila agrikultura. Ang mas episyente nga teknolohiya para sa pagkuha sang mineral nagaresulta man sa mas manubo nga empleyo sa mga minahan kag sa sobra nga suplay sang mineral sa kalibutanon nga merkado.

Ang kumbinasyon sang labing nagalala nga istagnasyon, depresyon kag paglala sang mga ekonomya sang mga atrasadong pungsod (nga labing nagadugang bangud sa pag-atras sang mga pungsod sa anay blokeng Soviet) kag sang paggamay sang sweldo kag mga sosyal nga benepisyo sang proletaryado sa mga industriyalisado nga kapitalistang pungsod nagresulta sa pagkitid sang pangkalibutanon nga merkado para sa produktong industriyal kag pangkonsumo. Padayon nga ginapataas sang mga nagadag sa kumpetisyon sang mga monopolyong kapitalista ang organikong komposisyon sang kapital (paagi sa pagpataas sang pirme nga kapital para sa pagpaandar sang produktibidad kag pagpangnubo sang di pirme nga kapital para sa sweldo).

Ang mga disbalanse sa ekonomya kag ang pagnubo sang tantos sang ganansya sa ila mga pungsod nagaduso sa mga korporasyong multinasyunal nga sudlon dugang ang mga dumuluong nga merkado. Gani nagatukod sila didto sang dugang nga mga planta para sa pag-asebol sang mga kotse, mga kagamitan pangbalay kag pila ka sandigan nga produktong industriyal kag para sa nagapagamay pero trabahuso nga paghimo sang mga *semiconductor*, bayu, sapatos, hampanganan kag iban pa sa mga pabrika sa China, India, Southeast Asia kag iban pa nga lugar. Responsible ang monopolyong burgesya sa istagnasyon kag paglala sa kaugalingon nila nga ekonomya,

sa pagtukod sang mga planta sa luwas sa tuyo nga mapadaku ang mga ganansya. Pero pagkadula sang empleyo sa mga imperyalistang pungsod ginabasol sini ang mga atrasadong pungsod kag ginadabukan sang sobinismo kag rasmismo batuk sa mga migranteng mamumugon nga kinaandan ginahatagan sang pinakamabudlay nga sari sang trabaho.

Ginagamit sang mga imperyalista nga gahum ang kapital sa pinansya sa porma sang mga direktang puhunan kag mga pautang agud masabat sang mayorya sang mga pungsod ang ila depisito sa badyet kag negosyo, mapabilin ang kadam-an sa ila bilang taga-eksport sang mga hilaw nga materyales kag ang pila bilang taga-reeksport sang mga manubo nga produkto nga semimanupaktura kag paludhon sila bilang ginalimusan nga mga suluguon, nga nagalukdo sa nagabug-at nga utang sa luwas. Kadam-an sang superganansya nga ginahukhok sang mga imperyalistang gahum halin sa mga atrasadong pungsod sa porma sang pagbayad interes sa pautang kag tubo sa komersyo sangsa porma sang kita halin sa mga puhunan sa produksyong industriyal.

Kahimbon sang ila mga imperyalistang amo sa US kag West Europe, padayon nga ginausmod sang mga gubyrno sang dalagku nga burgesyang kumprador sa East Europe kag sa anay mga republikang Soviet sa Central Asia ang ila mga pungsod sa patag sang ekonomya, pulitika, kultura kag moralidad. Nangin malakolonyal kag malapyudal ang kinaiya sining mga pungsod. Nagakalipay ang mga gubyrno sang East Europe nga sakupon sila sang European Union. Pero nangin talambakan lamang ang ila mga pungsod sang mga sobrang produkto halin sa US kag Western Europe. Ang makuha nila



**Sa idalum sang globalisasyon “hilway nga merkado”, naggrabe pa gid ang pagpamuyong, pagkaatrasado kag kaimulon sang mayorya sang mga pungsod.**

nga direkta kag indirekta nga pamuhunan amo lamang nagaserbi sa operasyon sang mga imperyalista-dalagku nga kumprador kag para sa pagpauswag sang imprastruktura kaangot sini.

Sa idalum sang globalisasyon “hilway nga merkado”, naggrabe pa gid ang pagpamuyong, pagkaatrasedo kag kaimulon sang mayorya sang mga pungsod. Nagdasig sang konsentrasyon kag sentralisasyon lunsay sang produktibo kag kapital sa pinansya sa mga pangkalibutanong sentro sang kapitalismo (ang US, Japan kag European Union). Sugod sadtong dekada 1980, hini-gop sang US ang kadam-an sang kapital halin sa luwas sang pungsod, ilabi na halin sa mga alyado sini nga imperyalista kag halin sa mga prodyuser sang langis, gani sa subong nangin pinakadaku nga taga-utang sa bilog nga kalibutan. Sa subong, US\$8.5 trilyones ang utang sa luwas sang US. Ginamit ini agud engganyuhon ang ispekulasyong pinansyal sa mga sapi, sa seguro kag pagtingub sang mga korporasyon, pahabukon ang mga pagpanag-iya sa mga korporasyon



**Tuyo sini nga gamiton ang “bilog nga gahum” sang US, ilabi na ang high tech nga hinganib-an militar, agud ilunsar ang mga pamugong nga aksyon batuk sa mga kaaway kag posible nga mga karibal, palaparon ang teritoryo nga pang-ekonomya sini kag palapnagon ang “hilway nga merkado” kag ipatuman ang “demokrasya”.**

kag pondohan sang nagadaku nga depisito sa negosyo bunga sang daku nga importasyon sang mga produktong pangkonsumo (ilabi na halin sa Japan, South Korea, Taiwan kag China).

Antes ang tuig 2000, sang magsugod magtibusok ang *stockmarket* sang US sadtong Marso kag nagtibusok ang produksyong industriyal sadtong Oktubre, ginapabugal sang US sa idalum ni Clinton ang pagbalay sini sang isa ka “bag-ong ekonomya” nga wala implasyon sa pihak sang todo nga empleyo kag mataas nga lebel sang pagkonsumo, bangud kuno sa nagspanguna nga papel sini sa produksyong *high tech*. Ginapabugal ang ekonomya sang US bilang “pangunahon nga motor” sang pangkalibutanon nga pag-uswag sang ekonomya kag bilang merkado nga “pinakaulihi nga dalagnan” sa atubang sang pagkunol sang Japan kag Germany. Sa idalum sang kaidalak halin 1995 tuhtub 2000—ang ekonomya sang US banggian nga nagahimo sang sobra nga produkto nga elektroniko kag pila pa nga produkto, kadungan nga ginahina ang ikasarang sini sa paghimo kag magbenta sang mas malapad nga tipo sang pangkonsumo nga manupaktura paagi sa pagpangutang agud mag-angkat sang mga ini.

Ang gulpe nga pag-us-os sang ekonomya sang US sadtong 2000 nagsunod sa krisis pangpinansya sa Southeast Asia sadtong 1997. Naipit ang semi-manupaktura nga mga eksport sang Southeast Asia sang mga eksport sang China sang pareho man nga produkto. Ang pagtimbuok sang ginpondohan sang dumuluong nga kapital halin sa mga bangko komersyal, naubusan sang hangin bangud sa sobra katama sa iya kapasidad. Naglupad pabalik sa mga imperyalistang pungsod ang mga ispekulatibong pamuhunan nga lupad-manok sa rehiyon. Nagtibusok ang mga lokal

nga kwarta relatibo sa dolyar sang US. Ginsundan ang krisis sang Southeast Asia sang krisis sa South Korea, Brazil, Russia, Argentina kag iban pa nga ginatawag nagautuhaw nga merkado.

Sugod sadto, naggamay ang ligwa para pag-uswag sa ekonomya sang US kag iban pa nga imperyalistang pungsod dulot sang pagkupos sa pangkalibutanon nga merkado para sa kagamitan nga elektroniko, kagamitan pangbalay, mga kotse, salsalon pangkonstruksyon, mga eroplano kag iban pa. Ang pila ka atrasadong pungsod nga nagaprodusar sang semimanupaktura nga mga produkto para pang-eksport nag-igo man sang mas daku nga kahalitan. Pero ang mas nag-guba amo ang mayorya sang mga atrasadong pungsod nga nagasalig sa paga-eksport sang hilaw nga materyales. Nag-antos sila sa nagadaku nga nagadaku nga depisito sa badyet kag negosyo, nagabug-at nga palas-anon nga utang kag napwersa nga magtaas sang buhis sa pihak sang pagsadsad sang ekonomya kag buhinan pa gid sang galastuhon bisan sa pinaka-basehan nga serbisyo sosyal.

Ginhingalitan sang rehimeng Bush ang mga atake sadtong Septyembre 11, 2001 agud dabukan ang kalayo sang gera sa ngalan sang “gera batuk sa terorismo” kag sa paglunsar sang pagpanalakay batuk sa Afghanistan kag Iraq agud ubuson ang nakatambak nga kagamitan militar kag mabuslan liwat ini sa pagpataas sang produksyon pang-gera. Ginatawag ini bilang “military nga Keynesianism” nga nagatuyo sa pasikaron ang nagapondo nga ekonomya sang US. Ginasigahum ini nga kinahanglanon katimbang sang nagapadayon nga polisiya sang globalisasyon sang “hilway nga merkado” Kaagot sini, ginapadaku sang US ang lebel sang tuigan nga galastusan militar sa US\$455 bilyones.



Wala nalimitahon ang rehimeng Bush sa gilayon nga katuyuan nga liwat paandaron ang ekonomya sang US paagi sang produksyon pang-gera. Ginatinguhaan sini nga iduso ang isa ka kumprehensibong plano, ang "Project for a New American Century", nga gindisenyo sang ginatawag mga neokonserbatio sa pagpasulong sang Pax Americana sa ika-21 siglo. Tuyo sini nga gamiton ang "bilog nga gahum" sang US, ilabi na ang high tech nga hinganiban militar, agud ilunsar ang mga pamugong nga aksyon batuk sa mga kaaway kag posible nga mga karibal, palaparon ang teritoryo nga pang-ekonomya sini (ginakuhaan sang hilaw nga materyales, balaligyaan, mga lugar sang pamuhunan kag sakup sang impluwensya) kag palapnagon ang "hilway nga merkado" kag ipatuman ang "demokrasya".

Madasig nga sobrang nahitad ang US ang kaugalingon sini sugod nga nagkabungkag ang mga rebisyonistang rehimen kag napukan ang Soviet Union sadtong 1989-91. Nasobrahan ang pagpapel sini bilang solohanon nga superpower. Ginalunsar sini ang duha ka gerang agresyon batuk sa Iraq (indi na pagsambiton ang unilateral nga gera pangkahanginan kadungan ang mga pagpang-ipit sa ekonomya sa tunga sang duha ka gera nga ini) nga nagatuyo agawon ang manggaranon resorsa sang langis kag magtukod sang mga base didto agud hugton ang kontrol sang US sa bilog nga Middle East. Ginsulsulan sini ang pagbahin-bahin sang Yugoslavia agud ipataw ang iya pagginahum sa Balkans, paluyahon ang poder didto sang Russia kag makatukod sang mga base sa Eastern Europe kag sa Mediterranean. Nakatukod na ini sang mga base kag dugang nga akses sa resorsa nga langis sa Caspian Sea kag Central Asia sa mga pagsalakay sini sa Balkans,

Afghanistan kag Iraq.

Pero tuman kaathag nga labaw nga nahitad ang US kag makit-an ang tanan nga bahin nga kahuyangan sa pagkalunod sini sa kumunoy sang Iraq. Nagasulong sang armadong nga pagpakig-away ang mga pumuluyong Iraqi, nakapatay sang masobra 2,200 kag nakapilas sang masobra 20,000 nga tropang US kag nagaobligar sa US nga maggasto sang masobra US\$220 bilyones sa kulang-kulang tatlo ka tuig. Ang pagpatay sang US sa masobra 250,000 Iraqi nagpabakod lamang sa pagbatu sang pumuluyong Iraqi. Ang pagbatu nga ini nagahayag sa mga kahuyangan kag bulnerabilidad sang imperyalistang gahum sang US.

Makadto sa kaugalingon nga kapaslawan sang US ang pagpabilin sini sa Iraq kag ang plano sini nga magamentenar sang daku nga kuta nga embahada sa Baghdad kag 14 nga base militar. Nahubog ini sa premyo nga langis sa Iraq kag sa bilog nga Middle East. Sa pagkontrol sa Iraq, gusto man sini nga paluntaron ang pagginahum nga US-Zionist batuk sa pumuluyong Palestinian kag Arabo. Pero nahigitan ini sang rebolusyonaryo nga armadong pagbatu sang pumuluyong Iraqi kag ginapwersa nga ibilin ang mga lokal nga problema pangkatilingban kag kinahanglanon sang pagmentenar sang pagginahum sini sa madamu nga pungsod.

Sa pagsulong sang tagsa-tagsa nga mga interes, may mabaskog nga mga pagpamatuk ang France, Germany, Russia kag China sa US sa halambalanon sang ikaduha nga gerang agresyon batuk sa Iraq. Sang dalayon nalunod ang mga banggianay nga ini ginlusob kag gin-okupar sang US ang Iraq. Pero padayon nga ginatublag sang isyu sang Iraq ang relasyon sa tunga sang mga magkaalyadong imperyalista bangud sa hayagan nga pagmonopolisa sang US sa benepisyo



**Pero tuman kaathag nga labaw nga nahitad ang US kag makit-an ang tanan nga bahin nga kahuyangan sa pagkalunod sini sa kumunoy sang Iraq.**

sang gera. Sa ano pa man, ginatinguha plantsahon sang mga magkaalyadong imperyalista ang ila interes batuk sa interes sang Iraq kag pumuluyong Iraqi. Sa sobra nga tum-ok sini sa Iraq, nagnubo ang ikasarang sang US sa iban nga bahin sang kalibutan, lakip ang East Asia kag Latin America. Bisan sa palibot sang Iraq, ang Syria kag Iran, nagapakita sang pagbatu.

Ginabuyok nga magbatu para sa pungsodnon kag kahilwayan sosyal ang pumuluyo sang kalibutan, pati na ang mga pungsod kag gubyerno para sa pungsodnon nga kahilwayan. Ginakaugtan subong sang pumuluyo sang kalibutan ang US bilang Numero Uno nga imperyalista kag teroristang gahum bangud sa wala untat nga pagpamuyong kag mga mapanalakay nga gera. Ginakundenar nila ang gubyernong US kag UK sa paglusob kag pag-okupar sang Iraq sa palso dahilan (bahin sa *weapons of mass destruction* kag angtanay sa Al Qaida). Ginakangil-aran nila ang imperyalismong US sa ginhimo nga rason ang atake nga Setyembre 11 agud maglunsar sang iya kaugalingon sini nga imperyalistang terorismo, palaparon ang mga monopolyong interes sang mga empresa nga multinasyunal sini kag dabukan ang terorismo sang estado sa bilog nga kalibutan.

Sa ngalan sang permanente nga "gera batuk sa teror", ginpasar

sang USA ang USA Patriot Act agud tapnaon ang mga kahilwayan sibil sang pumuluyong Amerikano, kag dabukan ang jingoismo, rasismo kag panatisismo sa relihiyon, ilabi na batuk sa pumuluyong Arabo kag nagapati sa Islam. Ginaduso sini ang mga pungsod sa pagdabuk sang “anti-terorista” nga isterya, tukuron ang imprastruktura para sa pasismo, sayup nga ilaragway bilang mga “terorista” ang mga kahublagan para sa pungsodnon nga kahilwayan kag mga anti-imperyalistang lider kag aktibista kag pahanugot ang mga pwersa militar kag ahensyang paniktik sang US nga magkidnap sang mga tawo, itortur sila sa mga sekreto nga bilanguan kag sa hatagan-ligwa ang dugang nga mga istasyon pang-isiya kag mga base militar sa ila mga teritoryo.

Labaw nga ginpaakig ang pumuluyong Amerikano sang polisiya ni Bush nga labi nga buhinan ang numero sang mga regular nga trabaho, panubon ang sweldo, benepisyong kag serbisyo sosyal kag sa pagdul-ong sang resorsa sa *military-industrial complex* kag sa makinarya pang-gera. Akig kaayo sila sa pagpadala sa gera sang mga pamatan-on nga lalaki kag babaye halin sa sahing anakbalhas, nga malapad ang resorsa sang estado ginsentro sa produksyon pang-gera, gerang agresyon kag sa madamu nga mga ahensya nga paniktik sa tuyo nga tukuron ang isa ka estado sang pulis sang US sa ngalan sang seguridad sang pungsod, samtang halos wala sang kwarta ukon gamay nga kwarta ang ginagamit para sa madasig nga pagkumpunir sang mga imprastruktura pareho sang mga dike sang New Orleans kag ilayo sa katalagman ang imol ang pumuluyo halin sa bagyo nga Katrina.

Ginagamit sang US ang Group of 8, ang OECD, ang IMF, World

Bank, WTO, ang UN Security Council kag mga alyansang multilateral kag bilateral agud palaparon kag palig-unon ang iya pagginhum sini sa madamu nga bahin sang kalibutan kadungan sang pagmentenar sang alyansa sini sa iban nga imperyalistang gahum batuk sa pumuluyo sang kalibutan. Pero magaabot sa pagpanibag-o sang mga alyansa ang mga imperyalistang gahum batuk sa isa kag isa sa tion nga labing magalubha ang krisis sang pangkalibutanon nga sistemang kapitalista, sa atubang sang pagluya sang US bunga sang unilateralista nga kahambugon kag sobra nga pagpalapad sang sakup sini, sa atubang sang nagtuhay-tuhay sang mga panindugan kag paghulag sang mga imperyalistang gahum kag nagkalain-lain nga pungsod kag gubyrno, kag sa pagkapot sang mga rebolusyonaryong pwersa sang inisyatiba sa ila kaugalingon nga pagpabaskog kag pagsulong.

Ang kumpetisyon pang-ekonomya kag ribalan sa pulitika sang mga imperyalistang gahum malala nga nagasingki bangud una sa tanan tuyo sang US nga monopolisahon ang benepisyong sang gera. Nabuyagyag ini sa mga kontradiksyon sa tunga sang US, UK, France kag Germany sa halambalanon nga pagsalakay sa Iraq sadtong 2003. Ang sobra nga kadaluk sang US signal sa iban nga imperyalistang gahum nga amligan ang ila interes kag maghulag kontra sa wala kabulusgan sang US. Magakitid nga magakitid ang lugar para sa matawhay nga kumpetisyon sa kubay sang mga imperyalistang gahum sa labing paglala sang krisis sang pangkalibutanon nga sistemang kapitalista kag sa pagdamo kag pagsingki sang rebolusyonaryong paghimakas sang pumuluyo kag sa pagdamo sang mga pungsod nga nagapanindugan sang ila



**Ang kumpetisyon pang-ekonomya kag ribalan sa pulitika sang mga imperyalistang gahum malala nga nagasingki bangud una sa tanan tuyo sang US nga monopolisahon ang benepisyong sang gera.**

pungsodnon nga kahilwayan.

Sa subong, nagasingki ang mga kontradiksyon sa tunga sang US kag iban nga imperyalistang gahum bahin sa halambalanon pang-ekonomya, pangpinansya, pangpulitika kag pangmilitar. Makit-an ini sa bilateral kag multilateral nga paghambalanay. Sa subong, makapan-kapan pa ang mga banggianay sa kalainan sang mga atrasado nga kontrolado pungsod. Pero kadungan man labi nga nagapanindugan ang mga pungsod sang ila kinamatarung para sa pungsodnon nga independensya kag kauswagan, sa pagsabat nila sa mga naga-sobra nga imperyalistang pagdikta, ginakilala nila ang kaugalingon nila nga importansya sa pangkalibutanon nga sistemang kapitalista ukon ginapwersa sila maghulag sa pagpangapin sang pungsodnon nga interes. Sa konteksto nga ini makita naton nga nagatingub ang China, India, Pakistan, Brazil kag ginagmay nga atrasadong pungsod batuk sa mapanghimulos kag mapiguson nga mga polisiya sang US kag iban pa nga imperyalistang gahum.

Ang Democratic People's Republic of Korea, Cuba, Venezuela kag Zimbabwe kabahin sa pinakamabakod sa pagpangapin sa ila pungsodnon nga independensya

kag handum pangkatilingban. Ang China, Russia, Kazakhstan, Kyrgystan, Tajikistan kag Uzbekistan masinulundon pero nagakabalaka sa pagsulod sang US sa Central Asia. Gani, nag-ululupod sila sa Shanghai Cooperation Organization. Nagabuligay ang China kag Russia sa US sa madamo nga nga posibleng isyu pero ginatib-ong man nila ang kaugalingon nga pungsodnon nga interes. Dalagku nga mga pungsod ini nga may signipikanteng kadamuon sang industriya kag armas nukleyar nga indi sila madali-dali diktahan. Sa kamatuoran, makamaniobra sila kag mapaaway-away nila ang mas poderoso kag manggaranon nga pungsod.

Ginapabugal sang US ang China bilang daku nga kadalag-an sa kapitalistang pag-uswag kag ginapanan-aw ini bilang potesyal nga karibal, ilabi nasa East Asia. Pero mas mapainubuson nga ginalaragway sang China ang kaugalingon bilang nagauswag ukon atrasado nga pungsod kumparar sa iya kada-kuon nga populasyon. Ginpribatisa sini ang empresa nga industriyal nga ginatag-iyahan sang estado kag mga komuna nga agrikultural.



**Nagaalsa ang malapad nga masa sang pumuluyo batuk sa imperyalismong US bilang**

**Numero Uno nga kaaway pati na batuk sa iban nga imperyalistang gahum kag mga papet nga estado nga labing malapit nga alyado sang US sa kalibutanon ukon pangrehiyon.**

Liwat subong nga ginakontrol ang ekonomya sini sang pagpamuhunan sa luwas. Tuman kadaku ang utang sini sa luwas (US\$233.3 bilyones) bisan pa nga may daku nga kapot sa mga seguro sa US. Kilala ini sa tuman kadaku sini nga eksport, nga masobra sa 70% may manubo nga dugang nga balor sang semimanupaktura nga produkto nga pangkonsumo sa mga imperyalistang pungsod. Pero 60 tubtub 80% sang bili sang ginaeksport ginatag-iyahan sang mga dumuluong nga kumpanya nga nakabase sa China. Napulo ka porsyento sang populasyong Tsino ang may maayo nga pangabuhì pero 90 porsyento ang imol. Lakip sa pinaka-imol kag disgustado ang mga mamumugon nga ginsipa sa mga kumbuyahan sang estado. Gani umpisa sang nagligad nga tuig natabo ang masobra 74,000 nga mga engkwentro sa tunga sang masa kag sang mga awtoridad

Bisan pa man, ang China nagananindugan sa kaugalingon sini nga pungsodnon nga interes angot sa Taiwan kag iban pa nga isyu. Sa pila ka kahigayunan, nanindugan ini batuk sa US. Nagbulig ini sa US sa pagtawag sang mga kumperensya agud magnegosasyon sa Democratic People's Republic of Korea sa halambalanon sang mga hinganiban nukleyar. Pero tubtub subong malig-on nga nanindugan ang DPRK batuk sa mga pamahug nukleyar kag pagpanalakay kag mga imposisyon sang US. Nakita man sang mga pungsod ASEAN nga kinahanglan magdebelopar sang mga relasyon pang-ekonomiko kag pangnegosyo sa China sa paagi sang pagbatu sa dominasyon sang US sa East Asia.

Nagaalsa ang malapad nga masa sang pumuluyo batuk sa imperyalismong US bilang Numero Uno nga kaaway pati na batuk sa iban nga imperyalistang gahum

kag mga papet nga estado nga labing malapit nga alyado sang US sa kalibutanon ukon pangrehiyon. Nagatukod sila sang mga organisyong masa base sa makasahing interes, sa tunga sang mga sahi, sektoral ukon multisektoral pati sa mga isyu sang pungsodnon kag sosyal nga paghilway, pag-uswag pang-ekonomya, tawhanong kinamatarung, pagpamatuk sa gera, pagkapalareho sa halambalanon sang rasa kag kasarian, pag-amlig sang kapalibutan kag iban pa.

May mga kahublagan sila sa pungsodnon, pangrehiyon kag pangkalibutanon nga sakup. Sa subong, ang International League of Peoples' Struggle amo ang pinakamalapad nga progresibong kahublagang masa, nga nagahatag igtalupangud sa 18 ka pangunahon nga isyu. Ang anti-imperyalistang kinaiya kag mga katuyuan sini matalum nga natuhay sa mga pormasyon nga repormista kag "civil society", lakip ang World Social Forum nga ginapondohan sang imperyalista, kag nakatum-ok sa repormismo kag pagpasanyog sang imperyalistang sistema. Tampok ang kaayo sang mga demokratikong organisasyong masa sang Pilipinas sa pagpauswag sang mga bilateral kag multilateral nga relasyon sa mga organisasyong masa sa iban nga pungsod.

Halin sa basehan nga paghiliusa nga anti-imperyalista, ginapauswag sang Partido ang mga relasyon sang pagkapare-pareho, respetuhanay kag kooperasyon sa pinakamadamu nga posibleng partido sang komunista kag partido sang mamumugon. Sa kaugalingon sini nga kahimtangan bilang isa ka pormasyon sang naghiliugyong prente kag sa pagtiglawas sang demokratikong gubyerno sang pumuluyo, ang ginapauswag sang National Democratic Front of the Philippines ang mainabyanon nga relasyon kag kooperasyon sa mga



**Ang nagaharing  
guban Arroyo  
sa subong  
amo ang  
pangunahong  
papet sang imperyalis-  
mong US,  
ang pangunahon  
nga tiglawas sang  
mga lokal nga nagaharing  
sahi kag ang pangunahon  
nga nagasakdag  
sang burukrata**

gubyrno sa iban nga pungsod, sa ila mga ahensya kag mga institusyon kag organisasyon nga di panggubyrno, mga kahublagan para sa kahilwayan kag iban pa nga rebolusyonaryong hublag.

Aktibo ang Partido sa pagpakigrelasyon kag pagbuligay sa mga partido nga Marxista-Leninista-Maoista kag mga progresibong organisasyong masa. Nagauswag ini sa nagkalain-lain nga pungsod sang kalibutan agud sa pagbatu para sa pungsodnon nga kahilwayan, demokrasya, sosyalismo kag pangkalibutanon nga kalinong batuk sa imperyalismo kag tanan nga reaksyon. Nagatinguha sila

nga palapnagon ang istrategikong linya sang malawigan nga inaway banwa bilang pamaagi sa pagpakig-away kag sa katapusan paglutos sa mga imperyalista.

Nagabaskog kag nagasulong ang armado nga rebolusyonaryong kahublagan sang pumuluyo para sa pungsodnon kag kahilwayan sosyal sa Iraq, Afghanistan, Colombia, India, Nepal, Pilipinas, Turkey kag iban nga pungsod. Nagadamu pa ang mga ini sa paglala sang pangkalibutanon nga krisis sa ekonomya kag sa labing pagkalubong sang US sa isa ukon sa pila ka pungsod kag paghalog sang pagkapot sini sa iban nga bahin sang kalibutan.

## **Garuk nga rehimen sa garuk nga nagaharing sistema**

Yara sa permanente nga krisis ang nagaharing sistema malakolonyal kag malapyudal sa Pilipinas. Ang aspeto nga malakolonyal nagatumod sa indi direkta nga pagginahum sang imperyalismong US paagi sa iya mga papet nga upisyal, halin sa nasyunal nga lebel panubo. Ang aspeto nga malapyudal nagatumod sa makasahing pagginahum sang lokal nga dalagku nga kumprador burgesya kag agalon nga mayduta.

Ang pagpamigos kag pagpanghimulos sa pumuluyong Pilipino sang dumuluong nga monopolyong kapitalismo, lokal nga pyudalismo kag burukrata kapitalismo nagaresulta sa nagapadayon nga proseso sang pagkadunot sang nagaharing sistema. Ang obhetibong kundisyon matambok para sa pagtukod sang mga suhetibong pwersa sang rebolusyon kag pagpahulag sa malapad nga masa sang pumuluyo.

Ang nagaharing guban Arroyo sa subong amo ang pangunahong papet sang imperyalismong US, ang pangunahon nga tiglawas sang mga lokal nga nagaharing sahi kag

ang pangunahon nga nagasakdag sang burukrata kapitalismo. Bangud nagaluntad sa balayon sang isa ka garuk nga nagaharing sistema, ang guban Arroyo wala sing pasikadtuan kundi madunot man. Bulag sini nga ginasunod ang mga pangpulitika kag pang-ekonomya nga mandu sang US kag sang lokal nga nagaharing sahi agud hikayan kag paantuson ang banwa. Daku ang benepisyong pagkamasinulundon sini sa porma sang burukratiko nga korapsyon.

Sa idalum sang gahum sang imperyalismong US, ang ekonomya sang Pilipinas ginapabilin nga agraryo kag malapyudal. Ang pangunahong pwersa sa produksyon sini ang masobra 13 milyones ektarya sang duta nga agrikultural kag ang mangunguma nga nagabug-os sang 75 porsyento sang populasyon. Ang proletaryado halos 15 porsyento lang sang populasyon (9 porsyento sa manupaktura kag ang iban sa minahan, mga utilidad pangpubliko kag iban pa). Ang industriya lubos nga nakasalig sa ginaangkat nga kaga-

mitan, langis kag iban pa. Ang kawad-on sang pungsodnon nga industriyalisasyon kag reporma sa duta nagpabilin sa Pilipinas sa kahimtangan nga atrasado kag lapnagon ang kaimulon. Ang pag-abot kag pagguwa sang mga migrante nga halin sa sahing mamumugon, mangunguma kag petiburgesya sa syudad indi makapabag-o sa sandigan proporsyon sang mga sahi sa Pilipinas.

Sa idalum sang polisiya nga "hilway nga merkado," ginabalewala sang reaksyunaryong gubyrno ang panawagan sang pumuluyo para sa reporma sa duta kag pungsodnon nga industriyalisasyon. Ginahingalitan sang dumuluong nga monopolyong kapitalismo ang denasyunalisasyon sang ekonomya sang Pilipinas, pagsapribado sang mga nagakita nga propyedad sang estado, liberalisasyon sang negosyo kag pamuhunan kag deregulasyon sang proteksyon para sa masang anakbalhas, kababaihan, mga bata kag sang kapalibutan. Ang reaksyunaryong gubyrno nagatras pati sa iya paltik nga reporma



sa duta kag hayagan nga ginapal-nag ang pribado nga akumulasyon kag konsentrasyon sang duta. Ang mga certificate of *land ownership amortization*, *certificate of land transfer*, *emancipation patents*,<sup>i</sup> kag pagpanagtag sang sapi sa mga korporasyong agrikultural basta na lang nga ginbalewala ukon ginbakal sing barato.

Agud mabayaran ang mga gina-angkat produktong pang-industiya kag pangkonsumo, nagasalig ang Pilipinas sa ginakita sang pangunahon nga produktong agrikultural kag mineral, sa remitans sang mga migranteng mamumugo kag sa labing nagadaku nga utang sa luwas. Sa pagdula sang mga taripa santu sa mga kasugtanan sang globalisasyon sang “hilway nga merkado”, bukas kaayo ang pungsod sa pagtinambak sang mga sobrang produktong agrikultural halin sa iban nga pungsod, nga nagabangkrap sa mga mangunguma kag pagwasak sa pungsodnon nga seguridad sa pagkaon. Nagabuhin ang produksyon sang agrikultural nga pang-eksport bangud indi sini sarang makigkumpetinsya sa mga produkto nga nagabaton sang daku nga subsidyo sa mga imperyalistang pungsod.

Ang balor sang ginaangkat sang manupaktura padayon nga nagataas relatibo mas madasig nga pagtibusok sang mga presyo sang mga pangunahong eksport sang Pilipinas, ilabi na may madugayan sobrang suplay sang mga produktong agrikultural kag mineral sa pangkalibutanon nga merkado. Gani, nagapadaku ang permanenteng depisito sa negosyo kag nagapadaku nga padaku nga utang sa luwas. Gamay katama ang ginakita sa eksport sang manubo nga gindugang nga balor semimanupaktura bangud sa nagapadaku nga bentahe sang imported kag hungod nga sobra nga pagpresyo (*transfer-pricing*) sang mga ini. Labi pa ini nga ginpagamay sang madugayan nga pagti-

busok sang *semi-conductor* (nga nagaabot sa 75 porsyento sang kabilugang kita sa eksport) kag iban nga semi-manupaktura.

Ang kita sang sobra otso milyones sang mga migranteng mamumugon (halos 10 porsyento sang populasyon) nagaabot sa US\$8.5 bilyones kag ginalauman nga magakita sang masobra US\$10 bilyones sa masunod nga tuig. Nalabawan sini ang kabilugang kita halin sa reeksport sang mga *semiconductor* kag sa pag-eksport sang pangunahong produkto. Ugaling, ginagamit ini sa pagbakal sang mga ginaimport nga produktong pangkonsumo. Gani madasig ang depisito sa negosyo kag nagadaku ang palasanon nga utang. Ang upisyal nga utang sa luwas nakalista sa lebel sang US\$56.047 bilyones, wala naisip ang yadtong bahin sang kabilugang reserba nga dolyar. Labi nga mapiguson ang mga kundisyon subong sa bag-o nga mga utang kag indi makatutop para sa pagbayad sa serbisyo sa utang. Sa pagbuhin sang mga pondo pangluwas, madasig nga ginapadaku sang reak-



**Gani, nagapadaku ang permanenteng depisito sa negosyo kag nagapadaku nga padaku nga utang sa luwas. Gamay katama ang ginakita sa eksport sang manubo nga gindugang nga balor semimanupaktura bangud sa nagapadaku nga bentahe sang imported kag hungod nga sobra nga pagpresyo (*transfer-pricing*) sang mga ini.**

syunaryong gubyrno ang lokal nga pangpublikong utang tubtub P3 trilyones agud tabunan ang depisito sa badyet.

Suma tatal, ang kabilugan nga pangpublikong utang masobra P6 trilyones. Sadtong nagligad nga tuig, gingasto sang reaksyunaryong gubyrno sa pagbayad sang utang publiko ang 81% nga nakakolekta nga buhis. Ginalauman nga 94% ang pagagastuhon subong nga tuig. Wala duda nga bangkarote ang gubyrno. Pero ang paggasto sang gubyrno lampuwas sa kita sini padayon nga nagakadto sa maanomalya nga mga proyektong pang-imprastruktura kag mentenar sang militar kag pulis. Nabuhinan ang pondo nga nagakadto sa mga serbisyo sosyal pareho sang edukasyon, ikaayong lawas kag pamalay.

Ginapabug-at ang palasanon nga buhis sang pagkupos sang ekonomya. Ginapalapad ang sakup sang value-added tax (VAT) kag pataasan ini sang 20%. Ang pagkupos sang ekonomya makita indi lang sa mga upisyal nga estadistika kundi pati sa aktwal nga mataas nga tantos sang disempleyo, ang padayon nga mga pagpahalin sa trabaho kag pagsara sang mga pabrika, ang paglugdang sang matuod nga kita sang masang anakbalhas kag nahanunga nga pwersa, ang pagtimbuok nga presyo sang mga basehan nga kinahanglanon bunga sang pagtaas sang bili sa importasyon, ang wala katapusan nga pagtaas sang presyo sang langis kag sukot sa nagame-nos nga serbisyo sang mga pangpubliko nga kumpanya (ilabi na sang kuryente, tubig kag transportasyon). Ang pagdamo sang mga nagapakalimos kag bata sa kalye sa kasyudaran kag nagapadaku nga numero sang mga mamumugon sa uma kag nagasadlayn sa kaumhan lunsay nagasalaming sang nagagra-be nga kundisyon sang kaimulon.

Lapnagon ang sosyal nga dis-

kuntento kag kinagamu. Sa pagprotesta batuk sa mapiguson kag mapaghimulos nga mga polisiya kag pagpahayag sang ila mga panawagan nga multisektoral kag sektoral, ang mga rali sang mga mamumugon, imol sa syudad, mangunguma, mangingisda, kababaihan, pamatan-on, empleyado sang gubyerno, propesyunal kag tawong simbahan napabilin nga nila matawhay. Pero arogante ini nga ginasumalang sang rehimeng Arroyo sa pagmandu sa militar kag pulisya mga pahugon kag atakehon ang pumuluyo nagapanindugan sa ila kinamatarung nga maghambal kag magtipon. Ang mga demonstrador mapintas nga ginabungkag kag ginamasaker pareho sang sa Hacienda Luista. Ginhimo kag ginapatuman sang rehimen sang polisiya sang “calibrated preemptive response” kon sa diin arbitraryo nga ginagamit sang militar kag pulisya ang pwersa simple nga suspetsa ukon pangpugong.

Sa ubay sang US, gintukod sang rehimeng Arroyo ang plano nga Bantay Laya sadtong 2001 bilang isa ka lima-ka-tuig nga pungsodnon nga kampanyang opensiba, pareho sa Lambat Bitag I, II kag III, sa tuyo nga waskon ang rebolusyonaryong kahublagan halin 2002 tubtub 2006. Umpisa 2002, nagkonsentrar ang mga pwersa militar kag mahulag nga pwersa sang pulis sa pila ka mga prenteng gerilya, nagamit sang mga *special operations team* para sa saywar nga katuyuan kag paniktik, kag nagtuga sang nari-saring kalakasan batuk sa pumuluyo, lakip ang pagpangkidnap, tortyur, salbedying, panunog, pamuyong, paghulog sang bomba, paganyon kag pwersahan nga ebakwesyon, sa desperado nga tikang nga waskon ang rebolusyonaryong hublag. Ang kasingki kag kalaparon sang mga paglapas sa tawhanong kinamatarung mapaangid sa pinakamalaut

sa idalum sang pasista nga rehimeng Marcos.

Agud tabunan ang salabton sini sa mga polisiya nga nagresulta sang tuman nga kabudlayan kag pag-antos sang banwa, ginabasol sang rehimen ang mga rebolusyonaryong pwersa amo man ang mga patriyotiko kag progresibo nga ligal nga organisasyong masa kag mga grupo sang *party-list* sa pagdamo sang mga martsa kag aksyong protesta. Pinakamalaut sa tanan, ginagamit sang rehimen ang mga death squad kag mga espesyal nga operatiba sang militar kag pulis agud kidnapon, tortyuron kag patyon ang mga tawo nga ginasigahum nga mga yabing lider ukon tagapensa sang kahublagang masa. Kalakip sa mga biktima ang mga pari, pastor kag iban nga relihiyoso, human rights nga aktibista, mga abugado, mamahayag, mga lider obrero kag mga katapu sang progresibong *party-list* kag mga lider sang mga mamumugon, mangunguma, kababaihan kag pamatanon.

Ang nagapasingki nga mga paglapas sang tawhanong kinamatarung lunsay sa urban kag kaumahan nagakuha sang inspirasyon sa polisiya nga “gera batuk sa teror” sang US nga matutom ginasonod sang rehimeng Arroyo. Mismo si Arroyo kag ang iya Cabinet Oversight Committee on Internal Security (COC-IS) ang nagadireher sang sistematikong paggamit sang kalakasan batuk sa mga pwersang patriyotiko kag progresibo kag sa nagapaisog-buot kag nagaproteher sa mga nagalapas sa tawhanong kinamatarung halin sa lebel sang mga kumandante heneral tubtub sa mga death squad kag mga manugpatay-tawo nga masami nakasakay sa motorsiko kag kotse.

Ginakangil-aran sang malapad nga pumuluyo ang rehimeng Arroyo sa tuman pag-ikog-ikog sini sa imperyalismong US, sa tuman na

nga korap, brutal kag butigon kag sa pagdinaya sini sa eleksyon presidensyal sadtong 2004. Ginapamilit nila ang pagpukan sa rehimen. Gani humalin sadtong Hunyo 2005, nagadebelopar ang isa ka malapad nga nagahiliugyong prente sang anti-Arroyo nga mga konserbatibong partido, sang ligal nga kahublagang masa kag mga seksyon nga anti-Arroyo sa sulod sang militar kag pulis kag nagatuyo pahalidon sa poder ang nagahari nga guban Arroyo.

Ang krisis sang nagaharing sistema madasig nga nagalala umpisa nga magluntad ang maathag nga ebidensya nga naghimbunay si Arroyo sa Commission on Election, ilabi na sa isa ka komisioner sang Comelec, kag pila ka mataas nga upisyal militar agud aregluhon ang pag-isip sang mga boto pabor sa iya kag baliskaron ang pag-isip sang mga lugar daug ang anhing si Fernando Poe, pangunahon sa Visayas kag Mindanao. Ang magkaangot nga mga isyu sang pagdinaya sa eleksyon kag iligal nga paggahum nagdabuk sang kaakig sa banwa kag nagpaakig sa mga gindaya nga partidong oposisyon kag mga kandidato. Sa sulod sang Armed Forces of the Philippines



**Pinakamalaut sa tanan, ginagamit sang rehimen ang mga death squad kag mga espesyal nga operatiba sang militar kag pulis agud kidnapon, tortyuron kag patyon ang mga tawo nga ginasigahum nga mga yabing lider ukon tagapensa sang kahublagang masa.**

(AFP) kag Philippine National Police (PNP), signipikante nga numero sang mga upisyal kag mas manubo nga ranggo sang tinawo ang naakig sa madasig nga promosyon sang mga maki-Arroyo nga upisyal nga bantog sa korapsyon, paglapas sa tawhanong kinamatarung kag imbolbado sa pagdinaya sa eleksyon.

Ang nagakubay nga kontra sa nagaharing guban Arroyo (Lakas-CMD) amo ang mga konserbatibong partido pulitikal, mga koalisyon kag kahublagan nga ginapamunuan ni anay presidente Joseph Estrada (Partido ng Masang Pilipino), ang balo sang gindaya nga kandidato presidensyal nga si Fernando Poe (Koalisyon ng Nagkakaisang Pilipino), Panfilo Lacson (Pwersa ng Masa kag Be Not Afraid Movement), Eddie Villanueva (Bangon Pilipinas Movement), Senador Aquilino Pimentel (PDP-Laban) kag Jejomar Binay (United Opposition). Nagatuyo ang mga ini sa pagbaylo sa guban Arroyo sang isa ka transisyunal nga konseho paagi sa kumbinasyon sang pag-alsa sang pumuluyo kag pag-atras sang suporta sang militar kag pulis sa rehimen.

Ginapahulag ni anay presidente Corazon Aquino ang iya mga sumulunod sa pulitika kag mga abyan sa mga obispo sang simbahang Katoliko, mga asosasyon sang mga negosyante kag mga grupo sa militar. Sa pagkapaslaw nga kumbinsihon si bise presidente Noli de Castro nga bayaan si presidente Arroyo, gusto subong ni Aquino kag iya mga sumulunod (lakip ang daku nga mayorya sang mga "sosyal demokrata") nga magpungko bilang presidente si Senate President Franklin Drilon (ang pinakadaku nga paksyon sa Liberal Party). Ginaduso pa ni anay senador Loren Legarda ang iya elektoral nga protesta batuk kay de Castro.

Ang koalisyon sang mga partido

sa Lakas-CMD hayag nga nagasuporta kay Arroyo. Pero mas nagasalig siya subong sa iya gamay nga partido (Kabalikat ng Mamamayang Pilipino ukon KAMPI) kag sa mga salaligan niya sa guberno. Ginaabandonar kag ginkundenar sang pila niya nga kabinete kag ni Senate President Drilon nga sang sadto nagasuporta sa iya. Si anay presidente Fidel Ramos kag House Speaker Jose de Venecia nagasuporta kay Arroyo batuk sa oposisyon, pero kadungan sini hayag nga ginpanugyan kay Arroyo ang pagbiya niya sa pagkapresidente sa katung-anan sang 2006 paagi sa pag-amendar sang konstitusyon nga magatalana sang pagsaylo sa isa ka parlamentaryo nga porma sang pagginuberno.

Ang tanyag nga pulungan ang Kongreso bilang isa ka "constituent assembly" nga magabaylo sa 1987 nga konstitusyon sang GRP ginagamit agud lunuron ang singgit para sa pagtalsik sa rehimeng Arroyo. Gani ginporma ni Arroyo ang ginatawag "consultative commission" nga ginabug-usan sang iya mga idu-ido, agud maghanda sang mga pagabag-uhon sa konstitusyon. Ginasumiter na sang komisyon ang mga rekomendasyon sini, lakip ang pagpabilin sa presidente agud superbisyoan tubtub 2010 ang interim nga primer ministro, pagkanse-la sa eleksyon ng 2007 agud palawigon ang termino sang tanan nga napilian nga upisyal, lusawon ang Senado kag pagpasulod sa mga senador sa unicameral nga parlamento kag pagkuhaon sa tanan nga restriksyon sa dumuluong nga pamuhunan.

May mabaskog nga patimaan nga pamatukan sang Senado ang pagpatawag sang "constituent assembly". Ginapanan-aw sang malapad nga masa sang pumuluyo kag sang malapad nga nagahiliugyong prente ang mga pagtanyag sang pagbag-o sa konstitusyon,



**Pero ang mayorya sang mga aktibo kag retirado nga tinawo sang millitar kag pulis disgustado sa korapsyon sang rehimen kag kapaslawan sini nga tumanon ang promisa sadtong 2001 nga pasakaan ila mga sweldo kag pensyon.**

indi lang bilang maniobra agud likawan ang pagpatalsik sa rehimen, kundi para palaparon ang gahum sang presidente kag hatagan sang dugang nga pribilehiyo ang mga monopolyong empresa sang US kag mga pwersa militar. Nagapabutyag sang pagkakibot si presidente Ramos sa ginaproponer nga kanselasyon sang eleksyon sa 2007. Nagasalig naman ang isa pa nga lider sang Lakas-CMD, si Speaker Jose de Venecia, madalasa sang rehimeng Arroyo ang mga ginaproponer nga pagbag-o paagi sa "constituent assembly".

Naga-ilusyon kag nagapabugal ang rehimeng Arroyo nga mamentenar sini ang kadena sang kumand sa sulod sang militar kag pulis. Ini bangud ginatugutan niya ang mga paborito sini sa mataas nga kumand nga mangurakot, maglapas sa tawhanong kinamatarung kag maghatag proteksyon ukon magoperar pati sang mga kriminal nga sindikato. Pero ang mayorya sang mga aktibo kag retirado nga tinawo sang millitar kag pulis disgustado sa korapsyon sang rehimen kag kapaslawan sini nga tumanon ang promisa sadtong 2001 nga pasakaan ila mga sweldo kag pensyon. Nagakaakig sila nga ang pagbenta sang mga kampo militar kag kumbersyon sang anay mga base mili-

tar sang US nagpamanggaranon kay anay presidente Fidel Ramos kag ginpangkawat pati ila mga sinup-tan nga pondo kag mga alokasyon sa badyet para sa pagkaon, beste, sapatos kag iban pa.

Ginapakagamay sang rehimen ang madalum nga diskontento kag kaakig sa iya sang mga upisyal kag tinawo sang AFP kag PNP. Ginagamit sini ang AFP kag PNP agud atakehon ang mga ligal nga demokratiko nga kahublagang masa sa kasyudaran kag ang rebolusyonaryong kahublagan sa kaumhan. Isa ini ka maathag nga paagi agud ang mga upisyal kag tinawo sang AFP nga magapabilin nga tampad sa rehimen. Pero doble nga disgustado ang mga upisyal kag tinawo sang AFP nga yara sa patag-awayan bangud sa kabudlayan pang-ekonomya sang ila mga pamilya kag ang kakulangan sang suplay kag *field ration*. Gani madasig nga nagadaku ang mga grupong anti-Arroyo sa sulod sang militar kag pulis. Nagakaakig ang mga tinawo sang AFP kag PNP. Natulunga sila sa tatlo ka grupo: ang mga loyalista nga maki-Arroyo, ang mga reaksyunaryo nga anti-Arroyo sa kubay sang mga mas mataas nga upisyal

kag ang mga progresibo nga anti-Arroyo sa kubay sang mga bataon nga upisyal.

Ang grupo sang mga anti-Arroyo nga reaksyunaryong upisyal ginabug-os pangunahon sang mga mas nakataas nga upisyal kag retirado nga mga heneral nga maki-US kag di gusto bag-uhon ang nagharing sistema. Nagtukod sila sang nanari-saring grupo. Kada isa ginapamunuan sang retiradong upisyal. Pinakatampok sa mga ini ang mga grupo nga ginapamunuan ni General Fortunato Abat, Commodore Appari, General Panfilo Lacson, kag Colonel Billy Bibit. Ginapamunuan ni General Abat ang Coalition for National Salvation kag nagatinguha nga magtipon sang suporta popular kag militar paagi sa pagproklamar sang kaugalingon niya nga gubyerno. Pero sa subong indi siya tuman ka epektibo sangsa gintukod kag ginpamuan niya ang FORCES nga madinalag-on nga nagpanawagan sang pag-atras sang suporta militar kay Estrada sadtong 2000 kag 2001.

Ang grupo sang mga anti-Arroyo nga progresibong upisyal ginabug-os pangunahon sang mga bata nga upisyal nga gusto magtibong sang patriyotiko kag progresibong pusisyon kag nagahandum sang mga sandigan nga repormang demokratiko. Nangasumpa sila nga sakdagon ang pagpamuno nga sibilyan pareho sa yadtong mga pag-atras sang suporta militar sa mga rehimen Marcos kag Estrada sadtong 1986 kag 2001. Aktibo nila ginatinguha makig-alyansa sa mga ligal nga demokratikong pwersa kag nagahandum magtungod sang mayor nga papel sa malapad nga nagahiliugyong prente paagi sa pagpanguna sa pag-atras sang suporta sang militar kag pulis sa rehimen kag pag-aresto sa mga yabing tinawo sang nagaharing guban Arroyo. Bukas sila sa untat-linupok

kag alyansa sa tunga sang GRP, AFP kag PNP sa isa ka bahin kag sang PKP, NDFP kag BHB sa pihak nga bahin sa tion nga matukod ang isa ka rebolusyonaryo nga nagadumala nga konseho. Sila ang positibo nga bunga sang pagbag-o sa sulod sang AFP kag PNP.

Ginahingalitan sang US ang desperado nga sitwasyon pang-ekonomya kag pangpulitika sang rehimen Arroyo. Wala untat ini sa pagpresyur sa rehimen nga labing mangin sinulundon sa mga dikta sang IMF, World Bank kag WTO kag sa mga empresa nga multinasyunal kag iduso pa gid ang linya sang permanente nga “gera batuk sa terorismo”, sakdagon ang nagapadayon nga presensya militar sang US kag palaparon ang mga pasilidad militar sang US sa pungsod kag ilunsar ang mga kampanya ng pagtapna batuk sa mga rebolusyonaryong pwersa sang pumuluyo, lakip ang sa Bangsamoro. Ginapagguwa kon kis-a sang rehimen Arroyo nga ang “gera kontra sa terorismo” nakatumod sa gintuga sang CIA nga Abu Sayyaf kag iban nga kaangot nga grupo. Sa kamatuoran, desperado ini sa padasigon ang pagpasar sang layi “kontra-terorismo” batuk sa mga rebolusyonaryong pwersa sang pumuluyo, lakip ang Bangsamoro, sa nagareklamo, sa ligal nga oposisyon kag sa malapad nga masa sang pumuluyo.

Nagahimbunanay ang rehimen Arroyo sa US agud ibutang ang PKP/BHB kag punong nga konsultant pangpulitika sang NDFP sa “teroristang listahan”, sa pagpa-singki sang mga kampanya sang pagtapna batuk sa rebolusyonaryong kahublagan kag sa pag-asasinar sa ginatus-gatos nga mga lider kag aktibista sang mga progresibo nga grupong *party-list* kag mga organisasyong masa sa lebel sang rehiyon, prubinsya kag lokal. Katuwang sa mayor nga katuyuan



**Ang grupo sang mga anti-Arroyo nga progresibong upisyal ginabug-os pangunahon sang mga bata nga upisyal nga gusto magtibong sang patriyotiko kag progresibong pusisyon kag nagahandum sang mga sandigan nga repormang demokratiko.**





---

**Nagasinggit ang malapad nga masa sang pumuluyo indi lang para sa pagpatalsik sa rehimeng Arroyo kundi para sa pagpukan sa bilog nga nagaharing sistema.**

---

nga waskon paagi sa militar ang rebolusyonaryong kahublagan ang katuyuan sang US-Arroyo nga iduso ang NDFP nga magsurender sa GRP paagi sa negosasyon pangkalinungan sang GRP-NDFP bilang negosasyon sa pagsurender. Wala sing ginahimo ang COCIS kag ang Office of the Presidential Adviser on Peace Process kundi ang paralishon ang negosasyon pangkalinungan sang GRP-NDFP kag nagasalig sa pagkawasak ukon pagsurender sang rebolusyonaryong kahublagan.

Sa pihak sang pag-andar sang Joint Monitoring Committee, baraghal nga ginabastos sang rehimeng Arroyo ang Comprehensive Agreement on Respect for Human Rights and International Humanitarian Law (CARHRIHL) paagi sa pagpasingki sini sang paglapas sa tawhanong kinamatarung. Wala ini sang aksyon sa mga ginpasaka nga reklamo angot sa paglapas sa tawhanong kinamatarung sang militar, pulis kag di regular nga armadong tinawo sang GRP. Ginalapas sini ang doktrina nga Hernandez sa mga kaso pulitikal kag nagaakusa sang mga komon nga krimen kag pati sang terorismo batuk sa mga rebolusyonaryo. Ginkawat sini ang kwarta para sa bayad-danyos sa mga biktima sang tawhanong kinamatarung sa idalum sang rehimeng Marcos kag

gingamit ini agud magdinaya sa eleksyon 2004 sa ngalan sang pagpanagtag sang libre nga abono. Mientras nagapabilin sa poder ang nagaharing guban Arroyo, indi makasulong ang negosasyon pangkalinungan sang GRP-NDFP sa pagatubang sa mga ugat sang armadong inaway kag paghimo sang mga kasugtanan sa mga basehang reporma sosyal, pang-ekonomya kag pangpulitika.

Labi nga malauton ang intensyon sang rehimeng Arroyo batuk sa pumuluyong Pilipino. Ginaduso sini ang ang anti-terorismo nga hagna agud tapnaon ang tanan nga pagpamatuk sa mga sini nga kontra-nasyunal kag kontra-pumuluyo, waskon ang mga rebolusyonaryong pwersa (lakip ang sa Bangsamoro) kag i-imposar ang pasista nga diktadurya nga wala ginadeklarar ang layi militar ukon *emergency rule*. Ang pumuluyo kag ang mga rebolusyonaryong pwersa ginahangkat nga makigbatu sa reaksiyunaryong estado sa isa ka kabuhi-kag-kamatayon nga paghimakas, nga wala lugar para sa negosasyon pangkalinungan. Gamit ang tiranikong gahum, ginalauman sang rehimen nga mabag-o ang konstitusyon sang 1987 sang GRP agud labing palabnawon ukon panason ang mga prubisyon kaangot sa proteksyon sang mga kahilwayan sibil, ang pungsodnon nga proteksyon sa mga dumuluong nga pamuhunan kag ang pagdumili sa teritoryo sang Pilipinas sang mga dumuluong nga base militar, mga tropa kag hinganiban nga madamuan sang kahalitan

Nag-uswag umpisa Hunyo 2005 ang malapad nga nagahiliugyong prente sang mga ligal nga pwersa sang pungsodnon demokratikong hublag, mga anti-Arroyo nga konserbatibong partido, mga koalisyon kag kahublagan kag ang mga anti-Arroyo nga mga kumand kag yunit

sa militar kag pulis. May potensyal ini nga patalsikon ang rehimeng Arroyo antes ang katung-anan sang 2006. May ikasarang nga patalsikon ang rehimen sa tion nga himunon sang nasambit nga tatlo ka mayor nga bahin sang malapad nga nagahiliugyong prente ang nila masaranggan sa pagmobilisa sang ila taga ka pwersa kag pagkoordinar sa isa ka desaysibo nga tion.

Luto katama ang kundisyon para pukanon ang rehimeng Arroyo. Kag labi pa ini nga paborable sa sa maabot nga mga simana kag binulan. Nagasinggit ang malapad nga masa sang pumuluyo indi lang para sa pagpatalsik sa rehimeng Arroyo kundi para sa pagpukan sa bilog nga nagaharing sistema. Ugaling may pagaagyan nga mga halintang antes magmadinalag-on ang bag-o nga demokratikong rebolusyon sang banwa sa pagpukan sa bilog nga nagaharing sistema.

Sandig sa rebolusyonaryong misyon sini, ginamanduan sang PKP ang Bag-ong Hangaway sang Banwa nga pasingkion ang inaway gerilya sa bug-os nga pungsod kag sa basehan sang nagapalapad kag nagapadalum sang baseng masa. Nagapanawagan man ini sa mga rebolusyonaryong pwersa sang Bangsamoro nga pasingkion ang ila armadong paghimakas, sa kahimtangan nga manipis nga nahitad ang mga pwersa sang kaaway resulta sang mga opensiba sang BHB. Ang mga taktikal nga opensiba sang BHB nagatuyo sa pagpabaskog sang armadong rebolusyon kag paluyahon ang rehimeng Arroyo. Ang mga ini maayo nga itumon batuk sa mga elemento nga maki-Arroyo sa militar kag pulis kag sa pinakamalaut nga nagalapas sang tawhanong kinamatarung.

Sa sulod sang malapad nga nagahiliugyong prente, posible

makig-isa sa mga kasugtanan kag pamaagi aaaagud malikawan ang engkentro sa tunga sang BHB kag mga anti-Arroyo nga seksyon ukon yunit sang AFP kag PNP kag agud magkoordinar kag magbuligay batuk sa rehimeng Arroyo. Sa isa ka nagakaigo nga tion, ang Partido sugot nga hayagan magsulod sa isa ka alyansa nga lakip ang mga

pwera nga anti-Arroyo sa militar kag pulis indi lang sa katuyuan nga pukanon ang rehimeng Arroyo kundi para man sa katuyuan sang buhion ang negosasyon pangkalinungan sang GRP kag NDFP kag hatagan-dalan ang basehan nga mga reporma nga pungsodnon kag demokratiko kag ang matarung kag malawigan nga kalinungan.



**Nag-angkon kita  
sang bulawa-  
non nga mga  
kadalag-an sa  
hilikuton pang-  
ideolohiya, pangpulitika  
kag pang-organisasyon.**

## Kahimtangan sang Partido kag mga kadalag-an

Bunga sng Ikaduha nga Dungganon nga Kahublagan Panadlong (IDKP), kada tuig mas nagabaskog ang Partido sa tanan nga bahin. Nag-angkon kita sang bulawanon nga mga kadalag-an sa hilikuton pang-ideolohiya, pangpulitika kag pang-organisasyon. Ang mga ini nagpundar sang malig-on nga tungtungan para matigayon ang aton subong nga Tatlo ka Tuig nga Plano. Ang Plano nga ini nagresulta sang mga signipikanteng kadalag-an kag ginpalawig asta 2006 agud mag-angkon pa sang mas dalagku nga resulta.

Mataas ang lebel sang rebolusyonaryong kamuklatan sang katapuan sang Partido bangud ginatunan kag ginaaplikar nila ang pangideolohiyang linya sang Marxismo-Leninismo-Maoismo sa ila rebolusyonaryong praktika. Napalapnag sang Partido ang Marxista-Leninista nga panindugan, pananawan kag metodo batuk sa suhetibismo, lakip ang empirismo, rebiyunismo kag dogmatismo. Nahimo ini sang Partido paagi sa diyalektiko-materyalista nga pag-analisa sa kasaysayan kag subong nga kahimtangan, dugang nga soysal imbestigasyon, mga pagsuma sang rebolusyonaryong hilikuton kag pagathag sa mga hilikuton. Ang mga kadre kag katapu sang Partido nagatigayon sang teoritiko nga

edukasyon, pagtuon sa mga dokumento sang panadlong, pagreport kag pag-analisa sa resulta sang sosyal imbestigasyon kag pulupanahon kag napanahon nga pagtasar kag pag-ebalwar sang hilikuton.

Kada katapu sang Partido nagaagi sa basehang kurso agud matunan ang mga sandigang prinsipyo sang Marxismo-Leninismo-Maoismo samtang ginaaplikar sa Programa para sa Demokratikong Rebolusyon sang Banwa, sa Konstitusyon sang Partido, sa Rebolusyon kag Katilingban nga Pilipino kag iban nga malahalon nga dokumento sang Partido. Ang mga kadre nagtuon sang intermedya nga kurso agud mahakos ang gintudlo ni Kaupod Mao Zedong angot sa rebolusyong Pilipino kag sa ibang rebolusyon agud sa pagkumparar. Ang mga kadre halin sa lebel prubinsya pataas nagatuon sang adbante nga kurso agud makaangkon sang kumprehensibo kag madalum nga ihibalo sa nga gintudlo sang mga dungganon nga komunista sa pilosopiya, ekonomya pangpulitika, estratehiya kag taktika kag sang internasyunal nga kahublagang komunista.

Ginapasiguro sang pormal nga pagtuon sang mga kurso nga huluhalintang nga napasaka sang mga kadre kag katapu sang Partido ang

ila rebolusyonaryong kamuklatan. Pero luwas sa pormal nga mga kurso, ginabuyok man sila nga basahon kag tun-an ang mga sinulatan nga Marxista-Leninista kag kaangot sang subong nga halambalanon sa sulod kag guwa sang Partido kag Pilipinas kag kaangot sang subong nga hilikuton kag problema tagsa-tagsa ka organo ukon yunit sang Partido. Yara kag bastante ang mga libro kag artikulo para tun-an kag basahon. Ang mga materyales para sa pagtuon, bulig sa pagtuon kag mga silabus ginasanto sa mga kaupod nga halin sa sahing mamumugon kag mangunguma nga may kahinaan sa pagbasa.

Samtang ginatigayon kag matalapos ang IDKP, nagpatuhaw sang madamo nga materyales sa pagtuon ang Komite Sentral kag naidalum nga mga organo kag yunit, amo man ang mga ginhiwat nga kumperensya sa nagkalain-lain nga patag sang hilikuton. Ang mga ini naghalin sa mga pagsuma kag paganalisa sang mga inagihan. Manggaranon ini nga kaban sang kinaalam para matumod ang aton mga kadalag-an, kasaypanan kag kakulangan kag para mag-ubay sa aton sa mas pursigido nga pagtrabaho kag paghimakas, pagpangibabaw sa mga kasaypanan kag kakulangan kag mag-angkon sang mas

maayo kag mas dalagku nga resulta. Wala untat ang hilikuton naton nga magsuma kag mag-analisa sang aton mga eksperensya.

Matalom nga ginpakita sang Partido ang petiburges nga makasahing basehan sang suhetibista nga mga kasaypanan nga lapnagon sa sulod sang Partido sadtong dekada 1980 kag tubtub ginlunsar sang Komite Sentral ng IDKP sadtong 1992. Gusto sadto nga pada-sigon sang mga suhetibistang petiburges pagdaog sang rebolusyon kag nag-imbento ukon gintiko ang datos agud suportahan ang ila dalamguhanon. Ginapamilit nila nga bunga sang daku nga kumprador-burgesya nga operasyon sang pasista nga rehimeng Marcos nga ginapondohan sang imperyalista, nag-industriyalisa kag urbanisado na ang pungsod nga nagasuay sa estratehikong linya sang malawigan nga inaway banwa.

Ginhimo nga modelo ukon padron sang mga dogmatista ang pag-alsa sang pumuluyo nga ginpamunuan sang petiburgesya batuk sa awtokratikong rehimeng Somoza sa Nicaragua kag tuman nga ginbasol nila ang linya sang malawigan nga inaway banwa sa kuno pagkaatrasar sa kadalag-an sang rebolusyon. Bunga sang ila padasu-daso, nagtuga sila sang grabe nga kahalitan sa rebolusyonaryong kahublagan kag nakahimo pa sang mala-la nga krimen batuk sa Partido kag sa pumuluyo. Nagproponer naman ang mga empirisista nga kuhaon ang proletaryadong pagpamuno sa pungsodnon nga nagahiliugyong prente kag itugyan ang pagpamuno sa mga burges nga lider bilang mahapos nila nga pamaagi sa pag-agaw sang poder. Nagbase sila sa mga NGO nga ginapondohan sang dumuluong. Kag nahulog sila sa impluwensya sang Gorbachovismo kag iban nga anti-komunista nga petiburges nga huyog sang pagpa-

mensar.

Nag-angkon sang kadalag-an ang Partido sa ideolohiya sa pagkontra kag pagpangibabaw sa dogmatista kag empirisista nga mga huyog sa sulod sang Partido kag sa pagtib-ong sa kawsa sang siyentipikong sosyalismo kag pagkundernar sa modernong rebisyunismo halin kay Khrushchov pakadto kay Brezhnev tubtub kay Gorbachov. Madinalag-on man ini nga nanindugan batuk sa nagkalain-lain nga kontra-proletaryado kag petiburges nga huyog sang pagpamensar sang indi magbag-o nga mga suhetibista kag oportunista nga naghandum atakehon kag waskon ang Partido halin sa sulod sang una kag sang ulihi sa guwa sang hayagan na sila nga nangin masupog nga kontrakomunista. Lakip sa mga huyog nga ini ang baraghal nga liberalismong burges, Trotskyismo, Gorbachovismo kag sosyal demokrasya.

Nagapadayon ang proseso sang pag-integrar sang teorya sang Marxismo-Leninismo-Maoismo sa kongkeretong kundisyon sang Pilipinas. Hanas kag may inaagihan ang mga kadre kag katapu sang Partido sa pag-analisa sa sitwasyon sa internasyunal, nasyunal kag lokal. Pirme sila nga nagahimo sang mga sosyal imbestigasyon agud magtuon halin sa masang mamumugon kag mangunguma, nangin malapit kag mag-ugat sing maayo sa ila. Madalum komitment nila nga alagaran ang pumuluyo kag pursigidi sila sa pagpasulong sang rebolusyon. Ila ginatarang ang mga hilikuton, ginalantaw ang mga positibo kag negatibo nga aspeto, nagakuha sila sang mga leksyon kag nagahimo sang pagsaway kag pagsaway-sa-kaugalingon agud tadlungon ang mga kasaypanan kag pauswagon ang ila trabaho.

Matutom nga ginasulong sang Partido ang pangkabilugan nga linya sang demokratikong rebolu-

syon sang banwa paagi sa malawigan nga inaway banwa batuk sa malakolonyal kag malapyudal nga nagaharing sistema sang dalagku nga kumprador burgesya kag sahi sang agalon nga mayduta nga masinulundon sa imperyalismong US. Ang nagapamuno nga pwersa sang rebolusyon amo ang sahing mamumugon. Ang Partido amo ang abante destakamento sini. Ang sahing manunguma amo ang mayorya nga sahi sa Pilipinas. Ang demanda nila nga makaangkon sang duta amo ang pangunahon nga kaundan sang rebolusyon.

Ang panawagan sang pumuluyong Pilipino para sa pungsodnon nga kahilwayan indi mahamulag sa demokratiko nga demanda para sa reporma sa duta. Ang mga panawagan nga ini lubos nga matigayon lamang sa paagi sa armadong paghimakas kag sa pagpukan sang nagaharing sistema. Sa tion nga maagaw sang pumuluyo ang gahum pangpulitika, kumpleto na sa sandigan ang demokratikong rebolusyon sang banwa. Lubos nga



**Matutom nga ginasulong sang Partido ang pangkabilugan nga linya sang demokratikong rebolusyon sang banwa paagi sa malawigan nga inaway banwa batuk sa malakolonyal kag malapyudal nga nagaharing sistema sang dalagku nga kumprador burgesya kag sahi sang agalon nga mayduta nga masinulundon sa imperyalismong US.**



**Nagahulag ang  
BHB sa  
masobra 100  
prenteng gerilya  
nga ginabug-usan  
sang mga baseng  
gerilya kag mas malapad  
nga sonang gerilya.**

mapatuman ang mga burges-demokratikong reporma pero samtang ginasuguran ang sosyalistang rebolusyon base sa pagpamuno sang sahing mamumugon sa demokratikong estado sang banwa kag nasyunalisasyon sang mga estratehikong industriya kag sang ekonomya sa kabilugan.

Paagi sa IDKP, lubos nga nalutos sang Partido ang “Wala” kag Tuo nga oportunistang linya nga supak sa linya sang demokratikong rebolusyon sang banwa paagi sa malawigan nga inaway banwa. Ginsaway kag ginsikway na sini ang mga “Wala” nga oportunistang linya pareho sang padasu-daso kag adbenturistang linya sang “estrategikong kontra-opensiba” kag insurreksyon nga “Red Area-White Area” (RAWA). Ginkundenar man sini kag ginhusgahan nga krimen ang pagpamatay kag pagpamintas batuk sa Partido kag pumuluyo sa ngalan sang mga kampanyang kontra-impiltrasyon. Ginsaway kag ginsikway na sini ang “Tuo nga oportunista” nga linya nga nagapaidalum sa burgesya sang mga rebolusyonaryong pwersa kag masa kag pagpasulong sang repormismo sa sulod sang nagaharing sistema.

Mapagros nga gina-integrar sang Partido ang pagtukod sang Bagong Hangaway sang Banwa sa reporma sa duta kag pagtukod sang baseng masa. Nagabaskog kag nagasulong ang BHB bangud ini

madalum nga nakaugat sa masang mangunguma kag mamumugon sa uma kag nagakuha sang kusog halin sa ila. Ang mga mangunguma kag mamumugon sa uma nagapasakup kag nagasuporta sa hangaway sang banwa bangud ini ang hinganiban nila sa pagpat-ud sang kadaglag-an sang subong nga lebel sang reporma sa duta kag sang rebolusyong agraryo sa ulihi. Ang mga pagsulong sa armadong paghimakas kag reporma sa duta nagaangtanay sa pagtukod sang mga organo sang gahum pangpulitika kag mga pangmasang organisasyon sang mga mamumugon, mangunguma, kababaihan, pamatan-on kag aktibista pangkultura kag bata.

Nagahulag ang BHB sa masobra 100 prenteng gerilya nga ginabug-usan sang mga baseng gerilya kag mas malapad nga sonang gerilya. Mas gamay sangsa una ang numero sang mga prenteng gerilya bangud sa pagtingub sa pila ka nagatambi nga prenteng gerilya para magkonsolida kag bangud sa konsentrong mga atake kag temporaryo nga pag-agaw sang kaaway sa pila sini sa idalum sang Oplan Bantay Laya. Ang mga prenteng gerilya yara sa nagapadayon nga proseso sang pagpalapad kag pagpabakod sa ubay sang mga kadre sang Partido sa mga yunit sang BHB kag sa lokalidad. Ang kinaandan nga armadong kusog sang BHB sa isa ka prenteng gerilya 75 tuhtub 120 pultaym nga hangaway nga armado sang mabaskog nga riple.

Dugang sa mga yunit gerilya ang mga yunit milisya nga nagaserbi nga lokal nga pwersa sang pulis kag mga yunit sa pagdepensa-sa-kaugalingon sang mga organisasyong masa. Linibo ang mga pultaym nga Pulang hangaway sa bilog nga pungsod, pila ka pulo ka libo ang katapu sang milisya kag pila ka gatos kalibo ang katapu sang mga yunit sa pagdepensa-sa-

kaugalingon. Ang mga prenteng gerilya nagasakup sang minilyunmilyon nga pumuluyo sa mas o menos 750 sang kabilugan nga 1500 nga munisipalidad. Yara sila sa masobra 70 sang kabilugan nga 79 ka prubinsya.

Ang BHB subong nagalunsar sang malaparan kag maikit nga inaway gerilya sa basehan sang nagapalapad kag nagapadalum nga baseng masa. Ginapauswag subong ang nahanunga nga lebel sang estratehikong depensiba sang inaway banwa. Umpisa Septyembre 13, nakalunsar ang BHB sang masobra 200 taktikal nga opensiba sa bilog nga pungsod. Nagresulta ini sa pagkaagaw sang signipikanteng numero sang mabaskog nga riple kag nakatuga sang ginatusgatos nga kaswalti (lunsay napatay kag napilasan) sa kaaway. Lakip sa mga opensiba ang mga ambus, reyd, pag-aresto kag isnayping. Ang mga katuyuan nagalakip sang pag-agaw sang mga armas, pagsilut, pagsablag kag pagharas sa kaaway. Depende sa target kag katuyuan, ang mga opensiba pleksible nga ginalunsar sang mga kumpanya, ginpadaku nga platun, platun, iskwad kag tim sandig sa plano kag pagsuundan.

Ginapasingki sang BHB ang mga taktikal nga opensiba agud pabakuron ang kaugalingon paagi sa pag-agaw sang mga armas sa kaaway kag dugang nga paluyahon kag ihamulag ang rehimeng Arroyo. Ginasilutan sini ang pinakamalaut nga tagalapas sang tawhanong kinamatarung kag mga buyong. Ginapwersa man sini ang kaaway sa depensibo nga pusisyon kag pagtunga-tunga sang pwersa sa pagbantay sa ila mga nakapirme nga pusisyon, linya sang suplay kag transportasyon, importante nga instalasyon, bodega kag kumpanya. Kadungan man, nagatanyag ang BHB sang pagpakig-abyan kag



pakig-alyansa sa mga upisyal kag yunit sang AFP kag PNP nga kontra sa rehimeng Arroyo kag gusto mag-upod sa malapad nga nagahiliug-yong prente nga kontra sini.

Nakaagaw ang BHB sang inisyatiba sa kaaway paagi sa pagpasingki sang mga taktikal nga opensiba. Ginahingalitan sini ang sitwasyon nga ang kaaway may madamo nga nahayag nga mahina nga bahin sangsa BHB. Sa kamatuoran, ano man nga tion gustuhon makareyd ukon makaambus ang mga yunit sang BHB sang mga mahina nga bahin pareho sang Citizens Armed Forces Geographical Unit (CAFGU), mga istasyon sang pulisya, magagmay nga detatsment, linya sang suplay kag transportasyon, instalasyon sang Philippine Army kag iban pa. Napangibabawan nila ang kaugalingon nga mga kahinaan paagi sa pag-agaw sang inisyatiba kag pagsiguro indi maggamit sang kaaway ang mga pamaagi pareho sang *periphery control* sang mga daku nga yunit kag impiltrasyon sang mga magagmay nga yunit (mga SOT kag *ranger teams*) kag ano pa nga may ara sila pareho sang mabaskog nga armas kag abunansya sa bala, superyor nga salakyan (sa duta kag sa kahanginan)



**Sa pagpasulong sang rebolusyonaryo nga armadong paghimakas, ginalunsar lang ang BHB amo ang mga opensibong operasyon ukon inaway nga sarang sini mapadaug, gamit ang superyor nga pwersa kag sorpresa sa taktikal nga lebel.**

kag mga bag-ong kagamitan pareho sang mga *night vision goggles*, *tracker*, *cell phone*, *armor vest* kag iban pa.

Paagi sa pag-agaw sang inisyatiba kag pagpasingki sang mga taktikal nga opensiba, naatubang sang Partido kag BHB ang madugay na nga problema sang konserbatismo: masami nga paglikaw sa pwersa militar sang kaaway, pag-asikaso lang sa hilikuton pangmasa kag wala pag-asikaso sa kinahanglanon nga maglunsar sang mga taktikal nga opensiba paagi sa pagsulong sang armadong rebolusyon. Naatubang man sang Partido kag BHB ang problema sa gerilyaismo ukon paminsaron rebeldeng lagawan: pirme nagahulag nga nakadispers sa mga armadong tim ukon iskwad pangpropaganda kag wala nagapalibog sa kakinahanglanon nga magplano sa lebel sang rehiyon, prubinsya kag prenteng gerilya kag magkonsentrar sang platun, ginpadaku nga platun ukon kumpanya agud makatigayon sang isa ka opensibong operasyon.

Agud mapasingki ang mga taktikal nga opensiba sa pungsodnon nga sakup kag amo man, sa sakup sang mga rehiyon kag prubinsya, ang mga natungdan nga nagapamuno nga komite sang Partido kag kumand sang BHB nagatipon sang supisyente nga impormasyon bahin sa kusog kag deployment sang mga pwersa sang kaaway, nagatasa sa mga kalakasan kag resorsa sang BHB kag nagaplano sang mga taktikal nga opensiba. Halin sa mataas tubtub sa manubo nga lebel sang pagdesisyon kag pagplano, ginahimo nga partikular ang plano nga relatibo pangkabilugan. Sa ila operasyunal nga lebel, dala sang mga pang-opensibang yunit sang BHB ang kinahanglanon nga inteligens kag rekonaysans kag ang mga tinawo kag kagamitan agud lutuson kag sorpresahon ang mga tar-

get nga kaaway.

Sa pagpasulong sang rebolusyonaryo nga armadong paghimakas, ginalunsar lang ang BHB amo ang mga opensibong operasyon ukon inaway nga sarang sini mapadaug, gamit ang superyor nga pwersa kag sorpresa sa taktikal nga lebel. Indi ini bulag nga nagapaspalad. Nagasalig ini sa suportang masa, bastante nga datos paniktik kag napapanahon nga paniktik. Ginahatagan prayoridad sini ang pag-agaw kag pagtipon sang mga armas kag bala. Samtang nagapasingki sang rebolusyonaryo nga armadong paghimakas, ginawasak ukon ginapaslaw sang BHB ang mga opensibong kampanya sang kaaway, napwersa ang kaaway sa depensibong pusisyon kag ginabuksan ang daku nga ligwa para sa hilikuton pangmasa. Ginasisiguro sini nga napatuman ang reporma sa duta kag pagtukod sang baseng masa.


Makakonsentrar ang pwersa sang kaaway sa diin man nga erya sa ano man nga tion kag maokupar nila ini sang madalian ukon malawigan. Pero angkon sang BHB ang pleksibilidad nga gamiton ang mga taktika sang pagtipon agud makahimo sang kaugalingon nga mga opensiba batuk sa mga mahina nga bahin sang kaaway, ang mga taktika sa pagsaylu-saylo ukon paglikaw sa konsentrasyon sang pwersa sang kaaway kag ang mga taktika sang pagbungkag agud makapropaganda kag magtungod sang hilikuton pangmasa.

Sa idalum sang Bantay Laya, indi mahimo nga maokupar tubtub san-o sang kaaway ang sobra 10 porsyento sang subong nga mga prenteng gerilya bangud sa kakulangan sang tinawo kag resorsa kag bangud ginahimo sila nga bulag kag bungol sang pumuluyo kag mga rebolusyonaryong pwersa. Gani sa indi magnubo sa 90 porsyento sang

mga prenteng gerilya, hilway nga magdebelopar ang mga rebolusyonaryong pwersa. Subong nga ginakaptan sang BHB ang inisyatiba kag ginapasingki ang mga taktikal nga opensiba sa bilog nga sakup, ang kaaway nakugmat kag nagadugo sa mga madamo nga pilas.

Ginapukaw, ginaorganisa kag ginamobilisa sang BHB ang masang mangunguma sa pagpatuman sang reporma sa duta. Sa kabilugan, minimum ang ginapatuman nga reporma sa duta. Nagalakip ini sang pagpanubo sang renta sa duta, pagkontrol sang interes sa pautang, pagpataas sang suhol sang mga mamumugon sa uma, pagpaayo sang mga presyo sang mga produkto sang mangunguma kag mapauswag ang mga produksyon agrikultural kag saydlayn nga palangitan-an. Sa amo man, may ginahimo nga tikang agud i-uli ang mga duta nga gin-agaw sa mga mangunguma paagi sa hayag nga paglaksam ukon pagbale-wala sang mga *emancipation patent*, *land transfer certificate*, *certificate of land ownership award* kag kasugtanan sa pagpanagtag sang mga sapi.

Ang madasig gihapon nga pamaagi sa pagtukod sang organo sang lokal nga gubyrno kag sa pagtipon sang suportang masa amo ang komite pang-organisa sa baryo nga gina-nombrar sang Partido sa natungdan nga yunit sang BHB. Pero sa husto nga panahon, ang lubos nga pag-uswag sang mga lokal nga organisasyong masa sang mamumugon, mangunguma, kababaihan, pamatan-on, aktibista pangkultura kag mga bata halin sa lebel sang mga komite kag grupong pang-organisa sang pumuluyo ang magahawan para sa eleksyon sang komiteng rebolusyonaryo sa baryo (KRB) sang mga tiglawas sang mga organisasyong masa ukon sang bilog nga baryo, depende sa kahimtangan pangseguridad. Katuwang sang KRB ang mga subkomite sa



---

**Ang madasig  
gihapon nga  
pamaagi sa  
pagtukod sang  
organo sang lokal  
nga gubyrno kag  
sa pagtipon sang suportang  
masa amo ang komite  
pang-organisa sa baryo  
nga gina-nombrar sang  
Partido sa natungdan nga  
yunit sang BHB.**

---

organisasyon, edukasyon, ikaayong lawas, reporma sa duta kag produksyon, depensa, arbitrasyon kag kultura kag suportado ini sang mga organisasyong masa.

Bilang abante nga destakamento sang nagapamuno nga sahi, padayon ang Partido sa pagtukod sang nagahiliugyong prente paagi sa pagtukod sang mga andana sang alyansa. Una ang basehang alyansa sang anakbalhas sang mga mamumugon kag mangunguma. Ikaduha ang progresibo nga alyansa sang masang anakbalhas kag petiburgesya sa syudad. Pangatlo ang patriyotikong alyansa sang progresibong pwersa kag sang pungsodnon nga burgesya. Ikaapat ang malapad nga nagahiliugyong prente sang mga patriyotikong pwersa kag mga bahin sang mga reaksiyunaryong sahi batuk sa mga pinakamalaut nga reaksiyunaryo nga may kinaiya kag papel sang kaaway.

Mabakod ang sandigang alyansa sang mga sahing mamumugon kag sang mangunguma. Madinalag-on ang Partido sa pagpamuno sa mga pangmasang paghimakas sang mga sahing mamumugon kag pagtukod sang mga angot sang sahing mamumugon sa Bag-ong Hangaway sang Banwa kag sa kahublagang mangunguma. Ang progresibo nga alyansa

sang mga anakbalhas kag petiburgesya sa syudad maayo nga ginapakita sang National Democratic Front of the Philippines. May kumprehensibo ini nga kubay sang 17 ka rebolusyonaryong pormasyon. Mabakod ang patriyotikong alyansa bangud pangu-nahon sa basehang alyansa kag progresibong alyansa, sa pihak sang mahuyang kahimtangan sa ekonomya kag nagakiya-kiya nga panindugan pangpulitika sang pungsodnon nga burgesya.

Wala duda nga nagabaskog ang malapad nga nagahiliugyong prente batuk sa rehimeng Arroyo. Ginabugos ini sang mga ligal nga pwersa sang pungsodnon-demokratikong kahublagan, mga partido sang burg-es nga oposisyon kag mga naathagan nga mga upisyal sang militar kag pulisya sang kaaway. Nagahulag ini agud pukanon ang rehimen pareho sa ginhimo sa pasista nga rehimeng Marcos sadtong 1986 kag sa korap nga rehimeng Estrada sang 2001. Ang nasambit nga mga rehimen lunsay ginpukan sa kumbinasyon sang indi armado nga pag-alsa sang pumuluyo kag sa pag-atras sang suporta sang militar kag pulisya.

Nagatuyo ang malapad nga nagahiliugyong prente sang mga pwersang anti-Arroyo nga nga pukanon sa gilayon ang rehimeng Arroyo. Amo man ang tuyo sang Partido. Pero ang rehimeng Arroyo ginadampigan kag suportado gihapon sang US, mayorya sang mga obispo kag kadam-an sang mga grupong negosyante. Nakapaniplang pa ang rehimen kag ginahingalitan ang panahon para magmaniobra kag manggunyapot sa poder. Pero labi lamang sini nga ginadabukan ang kaakig sang pumuluyo. Ang pagpalawig sang rehimen nagahatagkahigayunan sa BHB sang panahon kag mahatagan katumanan ang singgit sang pumuluyo nga rebolusyonaryong pagbag-o paagi sa rebolusyonaryo nga armadong paghima-

kas.

Napukaw, naorganisa kag napa-hulag ang ligal nga pangmasang paghimakas kag rebolusyonaryo nga armadong paghimakas ang masa sang pumuluyo para sa pungsodon nga kahilwayan kag demokrasya batuk sa US kag mga lokal nga nagapanghimulos nga sahi. Sistematisiko nga nagarekrut ang Partido sang mga katapu sang Partido halin sa kubay sang mga aktibistang masa kag ginahanas sila bilang mga rebolusyonaryo nga proletaryadong hangaway. Ang katapuan sang Partido nagdaku sa pila ka pulo ka libo sa sining nagligad nga tinuig.

Napadaku naton ang katapuan sang Partido sa bilog nga pungsod kag nagapadalum ang aton pag-ugat sa kubay sang masang mamumugon kag mangunguma. Nagarekrut kita sang mga katapu halin sa kubay sang mga nakatuon nga pamatan-on ( nga sa pangunahon nagahalin sa petiburgesya nga tagasyudad) agud mapanginpuslan ang ila propesyunal kag teknikal nga kahanasan kag magaremolde sila bilang mga proletaryong rebolusyonaryo kag mapaalagad sila sa pumuluyo. Pila ka guban sang mga mamumugon kag nakatuon nga pamatan-on ang nadeploy halin sa urban agud mag-alagad sa BHB kag sa kaumhan. Madasig sila nga

nagauswag agud mangin mga proletaryong rebolusyonaryo paagi sa direktang partisipasyon sa rebolusyonaryo nga armadong paghimakas kag sa hilikuton pangmasa sa kaumhan.

Ang Konstitusyon sang Partido kag mga kaangot nga desisyon sang Partido nagasaad sang depinido nga pagsulundan sa rekrutment, pagtukod sang mga sanga kag sa pagtukod sang mga organo sang pagpamuno. Ginatukod ang mga sanga kag grupo sang Partido sa basehang nga lebel: sa mga unyon sang mamumug-on. Pareho nga makahalalit ini sang burukratismo sa rebolusyonaryong hilikuton.

---

## Gilayon nga mapang-away nga mga hilikuton sang Partido

Ginabuyok sang Komite Sentral sang Partido Komunista sang Pilipinas ang katapuan sang Partido nga tigayunon ang mga target nga gintalana sang Tatlo ka Tuig nga Plano. Dapat naton padayunon papabakuron ang Partido sandig sa pang-ideolohiyang linya sang Marxismo-Leninismo-Maismo. Dapat naton isulong ang demokratikong rebolusyon sang banwa paagi sa malawigan nga inaway banwa. Dapat naton palaparon kag konsolidahon ang organisasyon sang Partido sandig sa demokratikong sentralismo.

Dapat naton muklat nga gamiton nga ubay sa aton rebolusyonaryong praktika ang mga ginatudlo nanday Marx, Engels, Lenin, Stalin kag Mao. Dapat naton hakson ang kaangtanan sang mga ini sa aton mga sinulatan kag desisyon sang Komite Sentral, mga manubo nga organo kag sang partikular naton nga mga yunit. Dapat mapaathag sang mga kadre sang Partido sa sitwasyon kag plano sang Partido angot sa pinakamaayo nga posible mahimo agud mapaabante ang rebolusyong Pilipino.

Dapat naton padasigon ang Marxismo-Lenismo-Maoismo nga edukasyon sang nagapadaku nga numero sang mga katapu sang Partido. Mapun-an naton ang subong nga numero sang mga instruktur paagi sa pagdelopar sang dugang nga mga instruktur halin sa mga nakatapos sang isa ka kurso, basehan man ini, intermedya ukon abante nga kurso. Mahimo naton kumbinahon ang mga eksperensyado kag mga bag-uhan nga instruktur. Dapat mangin lapnagon ang mga libro, artikulo kag iban pa nga materyales sa pagtuon agud mahatagan kahigayun



**Napadaku naton ang katapuan sang Partido sa bilog nga pungsod kag nagapadalum ang aton pag-ugat sa kubay sang masang mamumugon kag mangunguma.**

nan ang mga yunit kag indibidwal nga katapu sang Partido sandig sa ila kinahanglanon, interes kag kumpas.

Dapat naton padayon nga tun-an ang mga dokumento sang IDKP. Sano man kinahanglanon, dapat naton rebyuhon ang mga dokumento nga ini agud indi naton malipatan ang malahalon nga kaundan sang mga ini. Dapat naton hatagan sang tanan nga kinahanglanon nga tion agud tun-an ang subong nga mga pagsuma kag desisyon sang mga mataas nga organo kag mga kumperensya bahin sa mga hilikuton kag isyu. Sa aton mga yunit, dapat naton tasaran ang aton hilikuton, tumuron ang mga kadalag-an, kasaypanan kag kakulangan kag maghimo sang pagsaway kag pagsaway-sa-kaugalingon agud mapasanyog ang aton hilikuton kag estilo sang pagtrabaho.

Dapat naton pamatukan sing mas determinado ang imperyalismong US kag mga lokal nga mapanghimulos nga sahi. Ginapataw nila subong sa pumuluyong Pilipino ang pinakamapintas nga mga porma sang pagpamigos kag pagpanghimulos. Ginahalitan sang polisiya sang "hil-

way nga merkado” ang ekonomya nga wala pa maparesan sadto. Kag ginatapalan ang ginatawag nga gera batuk sa terorismo agud ipataw sa pumuluyo ang terorismo sang estado kag hatagan-rason ang interbensyon militar sang US. Labaw sa tanan, kinahanglan pamunuan sang PKP bilang rebolusyonaryong partido sang proletaryado nga pamunuan ang demokratikong rebolusyon paagi sa malawigan nga inaway banwa.

Dapat padayon nga maglunsar sang mga taktikal nga opensiba ang Bag-ong Hangaway sang Banwa sa bilog nga pungsod. Dapat kita makaagaw sang mga armas sa kaaway kag magtukod sang madamo pa nga mga armadong yunit agud pabakuron ang aton hangaway. Sa lebel pungsodnon, rehiyunal, prubinsyal kag prenteng gerilya, ang natungdan nga mga nagapamuno nga komite sang Partido kag kumand sang BHB dapat magtipon sang tanan nga malahalang nga impormasyon bahin sa militar, pulis kag iregular nga mga pwersa sang kaaway, magtasa sang mga ikasarang sang aton mga pwersa kag magplano nga mga opensiba para papason ang mga yunit sang kaaway. Dapat naton padayon nga pamatukan ang konserbatismo kag gerilyaismo. Dapat dugang pa naton tukuron ang BHB bilang pang-away nga pwersa sang pumuluyo agud padag-on ang rebolusyon.

Dapat naton paluyahon ang rehimeng Arroyo kag dapat kita mag-amot sa pagpukan sini paagi sa armadong paghimakas. Dapat naton silutan ang pinakamalaut nga nagalapas sang tawhanong kinamatarung kag mga buyong. Dapat maghimo kita sang mga tikang agud mapapas ang mga yunit kag elemento sang kaaway. Pero dapat man kita maghimo sang mga aksyon agud magapapas sa mga yunit kag elemento sang kaaway. Pero dapat

man kita maghimo sang mga tikang para pagbungkag-bungkagon pareho sang pagtarget lang sa mga yunit kag elemento sang AFP kag PNP nga mga loyalista ni Arroyo kag indi pagbira sa mga nagapakita nga sila batuk sa rehimeng Arroyo.

Dapat naton respetuhon ang mga kinamatarung sang mga upisyal kag ordinaryong suldado sang kaaway nga nagasurender sa aton ukon wala na sang ikasarang magaway. Kaangot sini, dapat kita mag-sunod sa mga sandigan nga kinamatarung nga ginasaad sang Ubay sa Pagtukod sang Gubyerno sang Pumuluyo, sa maayo nga pagtratar sa mga nabihag nga suldado sang kaaway sandig sa Mga Pagsulundan sa Disiplina sang BHB; kag nagasantu sa layi sang pagtrato sang mga bihag sang gera sa Geneva Conventions.

Dapat pauswagon sang BHB ang natunga nga subhalintang sang estratehikong depensiba paagi sa inaway gerilya. Samtang, ginapanan-aw sini ang abanteng subhalintang sang estratehikong depensiba. Malab-ot sa tama nga panahon ang halintang sang estratehikong patas, kon sa diin regular nga mahulag nga pagpakig-away na ang mangin pangunahon nga porma sang pagpakig-away. Kon naabot na naton ang kadakuon nga 15,000 tubtub 20,000 nga may mabaskog nga armas, mas maayo naton madepinar

ang halintang sang estratehikong depensiba kag mga subhalintang sini kag handaan ang ang estratehikong patas.

Ginatantya nga relatibo nga mas malip-ot ang estratehikong patas sangsa estratehikong depensiba, bangud sa panahon nga ini nagtaas na ang ikasarang sang BHB nga magpapas kag magbungkag sang mga pwersa sang kaaway kag mapanan-aw na ang estratehikong opensiba. Pero, kon may dumuluong nga interbensyon ukon agresyon militar, dapat himuon sang mga rebolusyonaryong pwersa ang kinahanglanon nga mga pagbag-o sa estratehiya kag taktika.

Sa subong pa lang, nagapagsanyog ang interbensyon militar sang US sa Pilipinas. Makakita ang BHB sang daku nga oportunidad nga maghatagan-hustisya ang 1.5 milyones nga Pilipino nga ginpamatay sang mga tropang Amerikano humalin 1899 asta 1913 kag ang indi maisip nga mga biktima sang imperyalistang pagpamuyong. Nagagamit ang US sang madamu nga klase sang mga mapanghalit nga armas agud patyon kag baldahon ang mga kaaway niya. Lakip sini ang Massive Ordnance Airblast Bombs (MOAB), ang *depleted uranium-tipped weapons, white phosphorus bombs, cluster bombs*.<sup>ii</sup> Tun-an naton ini gilayon kon paano makatuga sang mga kahalitan sa mga tinawo militar sang US kag maghimo sang iban nga tikang agud indi mabutong ang US nga labing magpamuyong sa Pilipinas.

Samtang ginapasingki naton ang rebolusyonaryo nga armadong paghimakas sa rehimeng Arroyo, dapat naton padayunon nga ipatuman ang reporma sa duta kag pagtukod sang baseng masa sa kaumhan. Dapat naton ipatuman ang reporma sa duta kag ang pag-uli sang mga duta sang masang mangunguma nga biktima sang pagpang-agaw sang duta.



**Dapat naton  
muklat nga  
gamiton nga  
ubay sa aton  
rebolusyonaryong  
praktika ang mga  
ginatudlo nanday Marx,  
Engels, Lenin, Stalin  
kag Mao.**



Dapat kita magtukod sang mga organo sang gahum pangpultika kag mga organisasyong masa sa malapad nga sakup. Dapat naton preparahan ang panahon kon sa diin magatalabo ang mga prenteng gerilya kag mangin malig-on nga baseng erya kag dason ang mga baseng erya magatalabo kag mangin mas malapad nga ginpahilway nga lugar.

Dapat wala untat naton nga pauswagon ang malapad nga naghiliugyong prente agud ihamulag kag waskon ang rehimeng Arroyo. Mahiliusa sini ang mga ligal nga pwersa sang pungsodnon- demokratikong kahublagan, ang konserbatibo nga mga partido nga oposisyon kag ang mga anti-Arroyo nga seksyon sang AFP kag PNP para pukanon ang rehimen. Kadungan sini, dapat pa naton pabakuron ang sandigang alyansa sang mga mamumugon kag mangunguma, ang progresibong alyansa sang mga anakbalhas kag sang petiburgesya sa syudad kag ang patriyotiko nga alyansa sang mga progresibong pwersa kag sang pungsodnong burgesya.

Sa The Hague Joint Declaration sadtong 1992 kag sa iban pa nga kasugtanang, nagkasugot ang GRP kag ang NDFP nga sugilanonan ang pag-angkon sang isa ka matarung kag malawigan nga kalinungan sa paagi sa paglubad sa mga ugat sang armadong inaway kag paghimo sang mga kumprehensibong kasugtanang bahin sa reporma pangkatilingban, pang-ekonomya kag pangpulitka. Paliwat-liwat nga ginasisiguro sang NDFP sa GRP nga posible ang untat-linupok kag alyansa kon magkasugot sila nga kumprontahon ang

dumuluong kag pyudal nga dominasyon.

Sa tigaylo, nagatinguha ang rehimeng Arroyo kag mga imperyalistang amo sini nga waskon ang rebolusyonaryong kahublagan kag piliton ang NDFP paagi sa pagbansag sang “terorista” kag sa pagpasingki sa mga paglapas sa tawhanong kinamatarung pareho sang pagkidnap, pagtortur kag pagpamatay sa mga upisyal sang grupong *party-list*, mga pari, mga nagasakdag sang tawhanong kinamatarung, mga abugado kag mamahayag nga ginaspetsahan lang nga may angot sa rebolusyonaryong hublag. Arogante ang rehimeng Arroyo sa pagpensar nga mapapas gid sini ang rebolusyonaryong kahublagan sa paggamit sang mga paghanas kag kagamitan militar sang US para sa mga papet nga tropa. Bilang sabat, ginamanduan sang Partido ang BHB nga agawon ang inisyatiba sa paglunsar sang mga taktikal nga opensiba batuk sa madamo nga nahayag nga mahina nga bahin sang kaaway.

Ugaling, pananglitan magmadinalag-on ang malapad nga naghiliugyong prente sa pagpukan sa rehimeng Arroyo kag kon may bastante nga numero sang mga patriyotiko kag progresibo ang yara sa konseho sang transisyunal nga gubyrno, bukas ang NDFP nga padayunon ang negosasyon pangkalinungan sa GRP kag pagtanyag sang untat-linupok kag alyansa sa katuyuan nga lubaron ang tatlo ka salot sang dumuluong nga monopolyong kapitalismo, lokal nga pyudalismo kag burukata kapitalismo.

Sa sulod kag guwa sang malapad nga naghiliugyong prente, dapat

mangin mabaskog ang ligal nga demokratikong kahublagan sa paghimakas batuk sa rehimeng Arroyo. Kag amo man ang armado nga rebolusyonaryong kahublagan. Maadasig ang pagdugang sang mga mamumugon kag nakatuon nga pamatan-on nga naga-entra sa BHB. Dapat magdamo pa sang mas madasig ang mga aktibistang masa kag mga Pulang hangaway paagi sa pangmasang kahublagan. Dapat sila mapatapu sa Partido sa pinakamadali nga panahon.

Kinahanglan kita sang ginatusgatos libo nga katapu sang Partido agud matuman ang mga dalagku nga hilikuton sang rebolusyon. Dapat naton tukuron ang mga sanga kag grupo sang Partido sa mga pabrika, linya sang transportasyon, baryo, plantasyon, organisasyong masa, institusyon kag hangaway sang banwa. Mas madamo nga kadre kag katapu, mas epektibong mapamunuan sang Partido ang rebolusyon.

Gintum-ukan naton ang kakinahanglanon nga pukanon ang rehimeng Arroyo. Agud matigayon ini, kinahanglan naton nga magpursiger sa pagpukaw, pag-organisa kag pagpahulag sa malapad nga masa sang pumuluyo. Sa sini, makatipon kita sang rebolusyonaryong kusog para bag-uhon ang malakolonyal kag malapyudal nga sistema. Indi bastante ang pagpukan sa rehimeng Arroyo. Dapat naton tinguhaon ang lubos nga katumanan sang demanda sang pumuluyo para sa pungsodnon nga kahilwayan kag demokrasya batuk sa imperyalismong US kag mga lokal nga mapanghimulos nga sahi. AB

---

<sup>i</sup> Ini ang mga dokumento nga ginahatag sang gubyrno sa idalum sang Presidential Decree 27 (ang layi sa reporma sa duta sa idalum ni Marcos) kag sang Comprehensive Agrarian Reform Law (CARL) nga nagaserbi nga kalig-unan sang pagsaylo sang pagpanag-iya sang duta sa mga mangunguma.

<sup>ii</sup> Ang mga ini lunsay mga hinganiban nga nagatuga sang tuman nga kahalitan sa kabuhi kag propyedad. Ang pagdumili sa mga hinganiban nga ini madugay na nga ginapanawagan sang mga tawhanong organisasyon.